

ԵՐԱԿՐԾՆԵԱ ՄԱՍԿՐԱՆ

ՄԱՅՐ ԱԹՈՌ ՍՈՒՐԲ ԷԶՄԻԱԾՆԻ
ԿՐՈՆԱԿԱՆ, ՄԵԱԿՈՒԹԱՅԻՆ,
ԼՐԱՏՎԱԿԱՆ ԵՐԿԵԱԲԱԹԱԹԵՐԹ

Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի ուղերձը Հանրապետության տոնի առիթով

Հայրապետական Մեր օրհնությունն ենք բերում ի հայրենիս և ի ափյուռս մեր ժողովրդի զավակներին և շնորհավորում Հանրապետության տոնի առիթով:

Այսօր ոգեկոչում ենք հիշատակները 1918 թ. մայիսյան հերոսամարտերի, մեր ժողովրդի դրսևորած աննկուն կամքի, միասնականության ոգու և քաջարի պայքարի, որի շնորհիվ հռչակվեց Հայաստանի առաջին հանրապետությունը: Դարերի ընդ-

միջումից հետո հայրենի հողում վերականգնվեց հայկական պետականությունը՝ արժանապատիվ ու ասպառի կյանք և լուսավոր գալիք կերտելու տեսիլքով:

Այսօր, երբ մեր ժողովուրդը կանգնած է նոր փորձությունների առջև և աղետալի պատերազմից ու Արցախի բռնազավթումից հետո կրում է արհավիրքների ծանր հետևանքները, Մայիսի 28-ի խորհուրդը կրկին հնչեցնում է անբեկանելի ճշմարտությունը, որ ժո-

ղովուրդը կարող է հաղթանակել, երբ միաբանված է մեկ նպատակով, մեկ ձգտումով ու բաղձանքով: Մեր անկախությունը մեր հայրերի սրբազան ավանդել է մեզ, որը պիտի փայփայենք և շարունակենք համատեղ ջանքերով շենացնել մեր երկիրը, գորացնել մեր պետականությունը:

Այս տոնական օրը աղոթում ենք աշխարհապաշտ մեր ժողովրդի խաղաղության ու բարօրության, մեր բանակի հզորության, մեր պե-

տության անվտանգության ու առաջընթացի համար: Թող մեր նախնյաց սիրանքները ոգեշնչեն մեզ՝ հավատալու մեր ուժերին, միավորվելու հայրենիքի, ընդհանուր նպատակների շուրջ և համատեղ ջանքեր ներդնելու մեր ազգային շահերի և իրավունքների պաշտպանության գործում:

Մեր Տեր Հիսուս Քրիստոսի շնորհները, սերը և ողորմությունը թող լինեն մեզ հետ և ամենքի, այսօր և միշտ. ամեն:



Հանրապետական մաղթանք և այց Սարդարապատի հուշահամալիր Հանրապետության տոնի առիթով

Մայիսի 28-ին Հանրապետության տոնի առիթով, Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի օրհնությամբ, Միաձնաէջ Մայր Տաճարում կատարվեց Հանրապետական մաղթանք: Արարողությունը հանդիսապետեց Մայր Աթոռ Սուրբ Էջմիածնի Արտաքին հարաբերությունների և արարողակարգի բաժնի տնօրեն Գերաշնորհ Ս. Նաթան արքեպիսկոպոս Յովհաննիսյանը:

Յոգևորականաց դասը և ներկա ժողովուրդն աղոթք բարձրացրին առ Աստված Հայաստանի Հանրապետության անսասանության, խաղաղ և բարօր կյանքի համար:

Մաղթանքի ավարտին Նաթան արքեպիսկոպոսն ընթերցեց Հանրապետության տոնի առիթով համայն հայությանն ուղղված Ամե-



նայն Հայոց Կաթողիկոսի ուղերձը: Նույն օրը Մայր Աթոռ Սուրբ Էջմիածնի միաբանները Գերաշնորհ Ս. Նաթան արքեպիսկոպոս Յով-

հաննիսյանի գլխավորությամբ այցելեցին Սարդարապատի հուշահամալիր, որտեղ Արմավիրի թեմի առաջնորդ Գերաշնորհ Ս. Սիոն



արքեպիսկոպոս Աղամյանի, թեմի եկեղեցականների ուղեկցությամբ հոգևորականները ծաղկեպսակ զետեղեցին հուշակոթողի առջև,

ապա աղոթեցին մայիսյան հերոսամարտերում զոհված քաջորդիների հոգիների հանգստության համար:

Համբարձման տոներ Մայր Աթոռ Սուրբ Էջմիածնում

Մայիսի 29-ին Հայաստանյայց Առաքելական Սուրբ Եկեղեցին տոնախմբեց մեր Տեր Հիսուս Քրիստոսի Համբարձման տոնը: Այս տոնին հիշատակվում է նաև 1441 թվականին Ամենայն Հայոց Կաթողիկոսության Աթոռը Սիս քաղաքից Մայր Աթոռ Սուրբ Էջմիածին փոխադրելու պատմական օրը:

Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի տնօրինությամբ տեղումի այս տոնը հռչակվել է նաև Սուրբ Էջմիածնի ուխտի օր:

Օրվա խորհրդի առիթով, Ամենայն Հայոց Հայրապետի օրհնությամբ, Միաձնաէջ Մայր Տաճարում մատուցվեց Սուրբ և Ամենա Պատարագ: Պատարագին էր Մայր Աթոռի միաբան Գերաշնորհ Ս. Հայկազուն արքեպիսկոպոս Նաշարյանը:

Սուրբ Պատարագի իր քարոզում Սրբազան Հայրը, անդրադառնալով տոնի խորհրդին, նշեց, որ Քրիստոս համբարձումից առաջ պատգամեց իր աշակերտներին անդադար քարոզել Աստծո խոսքը, տարածել իր ուսմունքը և դարձի բերել մոլորվածներին:

Պատարագից Սրբազանը խոսեց նաև Ամենայն Հայոց Կաթողիկոսության Աթոռը Սիս քաղաքից Մայր Աթոռ Սուրբ Էջմիածին փոխադրելու պատմական հիշատակության մասին՝ փաստելով, որ ճիշտ էին արևելյան վարդապետները, երբ որոշում կայացրին Հայ եկեղեցու հոգևոր կենտրոնը, Հայոց Կաթողիկոսության նստավայրը վերադարձնել իր աստվածօրհնյալ բնօրրանը՝ Մայր Աթոռ Սուրբ Էջմիածին:

«Սիրելի հավատացյալներ, Մայր Աթոռն այն ամուր հիմնաքարն է, որին եթե հայ ժողովուրդը հավա-



տարին մնա, ինչքան էլ հեռու լինի նրանից, ինչքան էլ տառապանքներ լինեն, միևնույն է, այս Աթոռից բխող լույսը հոգևոր ուժ պիտի տա

մեր ազգի զավակներին՝ դիմագրավելու ամեն տեսակ դժվարության, առաջ շարժվելու Տիրոջ հարության ու համբարձման խորհրդով՝ հավա-

տալով, որ լույսը միշտ հաղթական պիտի լինի խավարի դեմ», - ասաց Հայկազուն Սրբազանը՝ մաղթելով, որ վերանորոգյալ Մայր Աթոռ Սուրբ Էջմիածինը շարունակի լինել հայ ժողովրդի համար հոգևոր սնուցման աղբյուր և առաջնորդի հայորդիներին դեպի փրկություն մինչև մեր Տիրոջ՝ Հիսուս Քրիստոսի երկրորդ գալուստը:

Սուրբ Պատարագի ավարտից հետո Մայր Տաճարի Իջման Սուրբ Սեղանի առջև, հանդիսապետությամբ Արցախի թեմի առաջնորդ Գերաշնորհ Ս. Վրթանես եպիսկոպոս Աբրահամյանի, կատարվեց Հայրապետական մաղթանք, որի ընթացքում հոգևոր դասն ու ներկա հավատացյալ ժողովուրդն աղոթք բարձրացրին առ Աստված Մայր Աթոռ Սուրբ Էջմիածնի և Ամենայն Հայոց Հայրապետության անսասանության, պայծառության ու շենացման համար:

Բեռնում մեկնարկել է միջազգային համաժողով՝ նվիրված Արցախի հայկական հոգևոր և մշակութային ժառանգության պահպանությանը

Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի առաջարկով Եկեղեցիների համաշխարհային խորհուրդը (ԵՀԽ) և Շվեյցարիայի Բողոքական Եկեղեցին մայիսի 26-28-ը Բեռն քաղաքում կազմակերպել են «Կրոնական ազատություն. հայկական հոգևոր, մշակութային և պատմական ժառանգության պահպանումը Արցախում/Լեռնային Ղարաբաղում» խորագրով միջազգային համաժողով:

Մայիսի 27-ին համաժողովը բացվեց Ամենայն Հայոց Կաթողիկոսի օրհնությամբ և ուղերձով:

Նորին Սրբությունը իր գնահատանքը բերեց Եկեղեցիների համաշխարհային խորհրդի գլխավոր քարտուղար վերապատվելի Ջերրի Փիլային, Շվեյցարիայի Բողոքական Եկեղեցու նախագահ վերապատվելի Ռիտա Ֆամոսին, Եկեղեցիների Համաշխարհային խորհրդի վարչության անդամներին, համաժողովի կազմակերպիչներին և աջակիցներին, որոնց ջանքերի շնորհիվ ևս մեկ անգամ միջազգային հարթակից բարձրաձայնվում է Արցախի՝ Լեռնային Ղարաբաղի բռնազավթումից հետո հայ ժողովրդի առջև ծառացած մարտահրավերների մասին:

«21-րդ դարում, որ ազգերի ու պետությունների կյանքում պիտի մշակավորվեր խաղաղության, համերաշխության ու արդարության հաստատմամբ, ցավոք, ակամատես ենք պատերազմների, թշնամանքի ու ատելության հիմքի վրա իրականացվող ցեղասպանական գործողությունների ու եթնիկ զտումների, ինչպես և կրոնական ազատության և մարդու հիմնարար իրավունքների ունեցած դատարարների դեպքերի: Այս արհավիրքները վերապրեց նաև մեր ժողովուրդը Թուրքիայի ռազմական աջակցությամբ Ադրբեյջանի կողմից Արցախի նկատմամբ իրականացված ագրեսիայի ու ռճրագործությունների հետևանքով: 2020 թվականից սանձազերծված 44-օրյա և ապա նաև 2023 թ. լայնածավալ ռազմական գործողությունների ընթացքում բռնազավթվեց և ամբողջապես հայաթափվեց Արցախը: Գրավված են Հայաստանի Հանրապետության սահմանային կենսական մշակակություն ունեցող զգալի տարածքներ, խաղաղության պայմանագրի կնքման գործընթացում ներկայացվում են նորամուր պահանջներ: Ադրբեյջանը պատանդառված է պահում Արցախի քաղաքական ղեկավարների, քաղաքացիական անձերի և ռազմագերիների՝ իրականացնելով նրանց նկատմամբ ցուցադրական, շինծու դատավարություն՝ միջազգային իրավական նորմերի աղաղակող խախտումներով: Այն-հայտ է, որ այսօրինակ անօրինականություններն ու նվաստացուցիչ դաժանությունները պայմանավորված են բացառապես ազգային պատկանելությամբ և հայատյացությամբ, որը և պատճառ է ունենում Եկեղեցիների հայ



ժողովրդի հոգևոր-մշակութային ժառանգության ու պատմական սրբավայրերի նկատմամբ»,— մեզնե Հայոց Հայրապետը՝ ընդգծելով, որ արցախահայությունը դարեր շարունակ հայրենի իր երկրում հավատքով և ազգային ինքնությանը հավատարիմ ոգով կերտել է իր արժանապատիվ գոյությունը, դպրության և արվեստի բարձրարժեք արարումներով նաև հարստացրել մարդկության մշակութային գանձարանը:

Նորին Սրբությունը ցավով արձանագրեց, որ Արցախի բռնազավթումից հետո առաջուր շարունակվում է Ադրբեյջանի կողմից հայկական հնագույն հուշարձանների, քրիստոնեական սրբավայրերի, բնակատեղիների և գերեզմանոցների բարբարոսաբար ոչնչացումը: Ադրբեյջանը հայոց հնամենի մշակավոր վանքերն ու եկեղեցիներն ինքնուրույն զրկելու որոշմամբ քաղաքականությամբ աղվանական է հռչակում Արցախի հայկական հոգևոր-մշակութային ժառանգությունը:

«Ադրբեյջանի իշխանությունները շարունակում են անտեսել միջազգային հանրության կոչերը, հրաժարվում իրագործել եվրախորհրդարանի՝ 2022 թվականի «Լեռնային Ղարաբաղում մշակութային ժառանգության ոչնչացման մասին» № 2582 բանաձևի պահանջները, ինչպես և մերժում Արցախի հայկական հուշարձանների վիճակի գնահատման ուղղությամբ փաստահավաք առաքելություն իրականացնելու ՅՈՒՆԵՍԿՕ-ի նախաձեռնությունը: Ադրբեյջանի իշխանությունների հակահայկական քարոզչությանն է լծվել նաև Կովկասի մուսուլմանների վարչության նախագահ Ալլահշուքուր Փաշազադեն, որն օրեր առաջ հանդես եկավ



ստահող հայտարարություններով»,— հավելեց Վեհափառ Հայրապետը՝ մշելով, որ Ադրբեյջանի հայատյաց այս նույն գործելաոճով ժամանակին վայրագ ոչնչացման ենթարկվեցին Նախիջևանի հայկական սրբավայրերը, իսկ ճիշտ քսան տարի առաջ՝ 2005 թ., հողին հավասարվեցին Նախիջևանի՝ Հին Ջուղայի շուրջ վեց հազար խաչքարերը:

«Մշակութային ռճրագործությունները ցավալիորեն չեն ճանաչում աշխարհագրական սահմաններ և ամենուր են, որտեղ խաթարվում են մարդու և ժողովուրդների իրավունքները, դրսևորվում այլախոհություն և անհանդուրժողություն, անտեսվում հոգևոր ժառանգության վսեմ արժեքն ու կարևորությունը: Մշակութային ժառանգության նկատմամբ իրականացվող ռճիրներն արդարորեն դիտարկվում են ոչ միայն որպես մեկ ազգի, այլև համամարդկային արժեքների դեմ հանցագործություն:

Բարբարոսական այսօրինակ ռճրագործությունների անպատժելիությունը ամենաթողության մթնոլորտ է ձևավորում ոչ միայն Ադրբեյջանի մշակութակործան ռճիրները շարունակելու համար, այլ նաև նախադրյալներ է ստեղծում և քաջալերանք հանդիսանում մամառափա և ավելի դաժան հանցագործությունների իրականացման աշխարհի այլ վայրերում»,— ասաց Հայոց Հովվապետը՝ հաստատելով, որ մշակութային արժեքների պաշտպանությունը բոլորի համար ոչ միայն նվիրական պարտավորություն է, այլև ազգերի ու ժողովուրդների պատմության, հավատքի և ինքնության պահպանության հրամայական:

Ապա դիմելով համաժողովի մասնակիցներին՝ Նորին Սրբությունը ընդգծեց. «Արցախի

հոգևոր, մշակութային և պատմական ժառանգության պահպանության հարցն ավելի, քան երբևէ, հրատապ է այսօր, երբ Արցախի բռնի տեղահանված ժողովուրդը զրկված է սեփական հողի վրա ապրելու և արարելու, դարձրել իր հավատքով կերտած մշակույթ պահպանելու և զարգացնելու իրավունքից: Ժամանակակից աշխարհում չպետք է հանդուրժվեն մարդկության ու մարդկայնության դեմ նման սոսկալի եղեռնագործություններ, ազատության, արդարության ու իրավունքի հիմնադրամքները խախտող արարքներ: Այո, ազգերի միջև հակամարտությունները պետք է կարգավորվեն խաղաղ ուղիներով, արդարությամբ ու փոխհամաձայնությամբ, ազգային ինքնության ու արժանապատվության հարգմամբ»:

Մեծապես կարևորելով նման համաժողովների անցկացումը՝ Հայոց Հայրապետը հույս հայտնեց, որ միջազգային դերակատար երկրները և իրավասու կառույցները գործունե քայլեր կձեռնարկեն՝ ուղղված Արցախի հոգևոր-մշակութային ժառանգության պահպանությանը, արցախահայության՝ իրենց հարազատ բնօրրան անվտանգ վերադարձի, ազատ ու արժանապատիվ ապրելու արդար իրավունքի վերականգնմանը և հայ գերիների շուտափույթ ազատ արձակմանը:

Վերջում Նորին Սրբությունը շնորհակալություն հայտնեց քույր Եկեղեցիներին, միջեկեղեցական կազմակերպություններին՝ դժվարին իրավիճակում հայ ժողովրդին ու եկեղեցուն զորակցելու և արցախահայության իրավունքների պաշտպանության հարցում հետևողականություն դրսևորելու համար՝ արդյունավոր ընթացք մաղթելով համաժողովի աշխատանքներին:

Մայր Աթոռում տեղի ունեցավ շքանշանի հանձնման արարողություն

Մայիսի 24-ին Մայր Աթոռ Սուրբ Էջմիածնում, Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի հանդիսապետությամբ, տեղի ունեցավ պարգևաբաշխություն: Եկեղեցանվեր ու ազգօգուտ իրագործումների համար Նորին Սրբությունը Հայաստանյայց Առաքելական Սուրբ Եկեղեցու «Սուրբ Գրիգոր Լուսավորիչ» պատվո բարձրագույն շքանշան շնորհեց տիար Աթուր Գրանցին, որի ազնիվ բարերարությամբ կառուցվել է Բելառուսի Հանրապետության մայրաքաղաք Մինսկի Սուրբ Գրիգոր Լուսավորիչ եկեղեցին:

Արարողությունը բացվեց Տերունական աղոթքով և Մայր Աթոռի Դիվանատան Ներկեղեցական հարաբերությունների գրասենյակի տնօրեն Ալեքսանդր Բերաշնորի Տ. Եզրաս արքեպիսկոպոս Ներսիսյանը:



Մեծարյալի կյանքին և ազգօգուտ ու հայրենամարտ գործունեությանն անդրադարձավ Ռուսաստանի և Նոր Նախիջևանի հայոց թեմի առաջնորդ Գերաշնորի Տ. Եզրաս արքեպիսկոպոս Ներսիսյանը: «Էջ Միածինն ի Զօրէ» շարակա-

նի երգեցողության ներքո բերված Հայրապետական սրբատառ կոնդակն ընթերցեց Մայր Աթոռ Սուրբ Էջմիածնի Վարչատնտեսական բաժնի տնօրեն Գերաշնորի Տ. Սուրբ Էջմիածնի Բարաշյանը: Հայրապետական սրբատառ

կոնդակում ի մասնավորի ասվում է. «Առ Աստված հավատքով ու պատրաստական հոգով Դուք հանձն առաք Բելառուսում առաջին հայկական եկեղեցու կառուցումը՝ հոգևոր բերկրանք և խնդություն պարգևելով մեր ժողովրդի բարեպաշտ զավակներին:

....Նորակառույց եկեղեցու Սուրբ Խորանից բաշխվող երկնառաք շնորհներով զորանալու է բելառուսահայ համայնքի հոգևոր ու ազգային կյանքը՝ խաղաղված տերունաշնորհի հավատքի, առ հայրենին և առ եկեղեցին սիրո վրա, և Մեր զավակները Բարձրյալի օրհնության ներքո, հավատարիմ իրենց ինքնությանը, մեր ժողովրդի նվիրական ավանդներին ու արժեքներին, կերտելու են իրենց լուսավոր ու բարոյ ապագա Բելառուսի օրհնյալ երկրում»:

Կոնդակի ընթերցումից հետո Ամենայն Հայոց Կաթողիկոսը բա-

րերարի կուրծքը զարդարեց Հայ եկեղեցու բարձրագույն շքանշանով՝ վերստին բերելով նրան Հայրապետական իր օրհնությունն ու բարեմաղթանքները:

Պարգևաբաշխության առիթով իր սրտի խոսքն ասաց նաև շնորհընկալը՝ բարձր գնահատանքի ու պարգևի համար երախտագիտություն հայտնելով Հայոց Հայրապետին: Վերջինս Բելառուսի հայ համայնքի անունից նաև շնորհակալություն հայտնեց Նորին Սրբությանը Բելառուս կատարած նրա օրհնաբեր այցելությանը և նորակառույց եկեղեցու օծման համար:

Միջոցառմանը երաժշտական կատարումներով հանդես եկան Հայաստանի «Նոր անուններ» ծրագրի պատանի երաժիշտ-կատարողները:

Հանդիսությունն ամփոփվեց Ամենայն Հայոց Կաթողիկոսի «Պահպանիչ» աղոթքով:

Մայր Աթոռ Սուրբ Էջմիածնի արձագանքը Կովկասի մուսուլմանների վարչության նախագահի ստահոդ հայտարարություններին

Օրերս Բաքվում կայացած Ղազիների խորհրդի նիստում Կովկասի մուսուլմանների վարչության նախագահ Շեյխուլ-Խալան Ալլահշուքյուր Փաշազադեն, ստանձնելով արդեջանական քարոզչամեթոդային կեղծիքի տարածման դերը, հերթական անգամ ատելությամբ ու թշնամանքով թիրախավորել է հայ ժողովրդին և Հայ եկեղեցուն:

Կեղծիքի տարածման մեջ գերազանցելով ինքն իրեն՝ Փաշազադեն հայտարարել է, թե իբր Չայաստանում և տարածաշրջանում տասնյակ դարեր գործող հայկական սրբավայրերը, անգամ 1700-ամյա Սուրբ Էջմիածնի Մայր Տաճարը, գտնվում են «պատմական արդեջանական հողերում», և հայերը իբրև թե «յուրացրել են» այդ տարածքները: Ամեն ինչ պնդումների շարքը

Փաշազադեն եզրափակում է՝ Հայ Առաքելական եկեղեցին ներկայացնելով որպես սպառնալիք տարածաշրջանի երկրների համար:

Չավեշտալի է թվում, որ խորհրդային իշխանությունների ազդաշինարարության արդյունքում 1930-ական թթ. երկրորդ կեսին «արդեջանցի» էթնոհիմն ստացած ժողովրդի հոգևոր առաջնորդը փորձում է վիճարկել պատմականությունը հայ ժողովրդի, որի հազարամյակների ստեղծագործ կյանքի ու հոգևոր-մշակութային ժառանգության արժեքն ու պատկանելությունը համընդհանուր ճանաչում ստացած իրողություններ են: Առավել քան զարմանալի է, որ այլ զարթոնքների յուրացման մեջ հայ ազգին ուղղված մեղադրանքները ներկայացնում է մի երկրի ներկայացուցիչ, որի պետության

անվանումն իսկ յուրացված է այլ երկրից ու ժողովրդից:

Նույն էժանագին գործելաոճն է ընկած նաև Ռուսաստանի ու Նոր Նախիջևանի թեմի անվան շուրջ Փաշազադեի կատարած շահարկման հիմքում: Ի գիտություն պետք է ընդունել, որ Դոմի Ռոստոփի մերձակա բնակավայրերն անվանվել են «Նոր Նախիջևան» հենց ցարական Ռուսաստանի իշխանությունների որոշմամբ՝ որպես հարգանքի արտահայտություն պատմականորեն հայկական Նախիջևանից այդ տարածք տեղափոխված հայերի:

Արդեջանի հոգևոր առաջնորդի հրապարակային խոսքերում շարունակաբար տեղ գտնող թշնամանքի ու կեղծարարության մասն դատապարտելի դրսևորումներն ինքնին վկայությունն են այն իրողության, որ



Արդեջանը հենց ինքն է, Փաշազադեի խոսքերով ասված, սպառնալիք տարածաշրջանի հարևան երկրների համար:

Եվ վերջում՝ հարկ է մեկընդմիշտ արձանագրել, որ սուտն ու կեղծիքը երբեք չեն կարող ճշմարտության վերածվել, որքան էլ հաճախ ու խանդավառությամբ կրկնվեն:

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ Ամենայն Հայոց Կաթողիկոսն ընդունեց

Մայիսի 15-ին

Շվեյցարիայի խորհրդարանի Ազգային խորհրդի պատգամավոր Էրիխ Ֆոնտորեյլին

Ն. Ս. Օ. Տ. Տ. Գարեգին երկրորդ Ծայրագույն Պատրիարք և Ամենայն Հայոց Կաթողիկոսն ընդունեց Շվեյցարիայի Համադաշնության խորհրդարանի Ազգային խորհրդի պատգամավոր Էրիխ Ֆոնտորեյլին:

Հանդիպմանը Նորին Սրբությունը գոհունակություն հայտնեց Շվեյցարիայի իշխանություններին Հայաստանին ցուցաբերվող զորակցության և հայ ժողովրդի առջև ծառացած մարտահրավերների հաղթահարմանն ուղղված ջանքերի համար: Այս առնչությամբ Վեհափառ Հայրապետը գնահատանքով անդրադարձավ տիար Ֆոնտորեյլի նախաձեռնած և Շվեյցարիայի խորհրդարանի երկու պալատների կողմից ընդունված բանաձևին՝ ի նպաստ բռնի տեղահանված արցախահայերի իրավունքների պաշտպանության և իրենց պատմական հայրենիք անվտանգ ու արժանապատիվ վերադարձի ապահովման:

Իր հերթին Էրիխ Ֆոնտորեյլը Հայոց Հայրապետին ներկայացրեց «Լեռնային Ղարաբաղի համար խաղաղության ֆորում. հայերի վերադարձի հնարավորության ապահովում» բանաձևի ընդունման գործընթացը, ինչպես նաև դրա նպատակներն ու հետագա գործողությունների տեսլականը՝ ընդգծելով, որ արցախահայերի վերադարձը միջազգային



իրավունքի արդար պահանջ է, և հարցը պետք է հետևողականորեն բարձրաձայնել ու ներկայացնել միջազգային համապատասխան ատյաններում:

Հանդիպմանն անդրադարձ կատարվեց նաև Շվեյցարիայի հայ համայնքի կարևոր դերակատարությանը երկու ժողովուրդների բարեկամական հարաբերությունների հաստատման և երկրի առաջընթացի կերտման գործում:

առիթ ունեցել են շփվելու հայ համայնքների հետ, ծանոթանալու հայ ժողովրդի ազգային ավանդույթներին ու դավանած արժեքներին՝ հավելելով, որ սեմինարի անցկացումը Հայաստանում պիտի առիթ դառնա ավելի լավ ճանաչելու երկիրն ու նրա բազմադարյա ժառանգությունը, ինչպես և հաղորդ դառնալու Հայաստանում տիրող դժվարին կացությանը:

Նորին Սրբությունը նաև մտահոգությամբ անդրադարձավ հայ ժողովրդի առջև ծառացած անվտանգային մարտահրավերներին, Արցախի բռնազավթման, հայրենազրկված արցախահայության իրավունքների պաշտպանության և Արդեջանում մինչ օրս պահվող հայ գերիների վերադարձման

խնդիրներին, ինչպես և Արցախի հայկական հոգևոր-մշակութային ժառանգության ոչնչացման ու յուրացման փաստերին՝ ընդգծելով տարածաշրջանում խաղաղության ու կայունության վերականգնման անհրաժեշտությունը: Նորին Սրբությունը կարևորեց ԵՄ երկրների ու կառույցների կողմից առավել գործուն քայլերի ձեռնարկումը Արդեջանի վարած հայատյաց քաղաքականության առնչությամբ:

Վերջում ղեկավար Մարագոսը, շնորհակալություն հայտնելով Հայոց Հայրապետին ընդունելության համար, կարևոր նկատեց Հայ եկեղեցու հետ երկխոսությունն ու գործակցությունը՝ ի նպաստ հարատև և արդար խաղաղության հաստատման:



Մայիսի 22-ին

Վերապատրաստման հերթական դասընթացի մասնակիցներին

Ամենայն Հայոց Կաթողիկոսն ընդունեց եկեղեցականների վերապատրաստման դասընթացներին մասնակից Հայաստանի և Սփյուռքի տարբեր թեմերից ժամանած հոգևորականներին:

Մայր Աթոռ Սուրբ Էջմիածնի «Գարեգին Ա» կրթական կենտրոնի և Մայր Աթոռ Սուրբ Էջմիածնի եկեղեցականաց վերապատրաստման ծրագրերի տնօրեն Գերաշմորի Տ. Վահան եպիսկոպոս Հովհաննիսյանը, ամփոփելով ծրագրի 2023–2025 թթ. ընթացիկ փուլը, որին մասնակցել է շուրջ 400 անձ, անդրադարձավ դասընթացների օգտակարությանը: Սրբազանն իր երախտագիտությունը հայտնեց Ամենայն Հայոց Հայրապետին ծրագրի և մասնակից հոգևորականների նկատմամբ հայրական հոգածության համար:

Այնուհետև ներկայներին իր օրհնությունը բերեց Նորին Սրբությունն Գարեգին երկրորդ Ամենայն Հայոց Կաթողիկոսը: Հայոց Հովվապետը գոհունակություն հայտնեց վերապատրաստման ընթացքում արձանագրված արդյունքների առնչությամբ՝ ընդգծելով աստվածաբանական գիտելիքների վերաթարմացման, հովվական փորձառության

փոխանակման, ինչպես նաև եկեղեցու և հասարակության առջև ծառացած մարտահրավերների ու դրանց հաղթահարման ուղիների շուրջ քննարկումների կարևորությունը:

Վեհափառ Հայրապետն իր գնահատանքը բերեց Վահան Սրբազանին և վերապատրաստման ծրագրերի փոխտնօրեն Տ. Շնորհք աբեղա Սարգսյանին դասընթացների կազմակերպման գործում ցուցաբերած նախանձախնդրության համար՝ տեղեկացնելով, որ դասընթացները հաջորդ փուլում կկազմակերպվեն ըստ տեսական ու գործնական աստվածաբանության թեմատիկ ուղղությունների՝ մերօրյա մարտահրավերներին և հոգևոր սպասավորության արդի պահանջներին համապատասխան:

Ամենայն Հայոց Կաթողիկոսը քահանա հայրերին պատգամեց կոչման բարձր գիտակցությամբ և անվերապահ նվիրումով շարունակել իրենց ծառայությունը եկեղեցուն, ազգին ու հայրենիքին՝ իրենց համայնքներում և ամենուր հայորդիներին համախմբելով ի խնդիր հայրենիքում առկա դժվարությունների հաղթահարման և երկրի հզորացման:



Մայիսի 21-ին

Արևելյան Եվրոպայի և Կենտրոնական Ասիայի ԵՄ դեսպաններին

Ամենայն Հայոց Կաթողիկոսը հանդիպեց Եվրոպական Միության Արևելյան Եվրոպայի և Կենտրոնական Ասիայի դեսպանների տարածաշրջանային սեմինարի մասնակիցների հետ:

Հանդիպմանը ՀՀ-ում Եվրոպական Միության պատվիրակության ղեկավար, ԵՄ դեսպան Վասիլիս Մարագոսը Նորին Սրբությանը ներկայացրեց ԵՄ դեսպաններին՝ ընդհանուր տեղեկություններ փոխան

ցելով հավաքի վերաբերյալ: Ամենայն Հայոց Հայրապետը, ողջունելով ղեկավարների տարածաշրջանային սեմինարի մասնակիցներին այցը համայն հայության հոգևոր կենտրոն, անդրադարձ կատարեց Հայոց եկեղեցու առաքելությանը հայ ժողովրդի կյանքում:

Վեհափառ Հայրապետն իր խոսքում նշեց, որ դեսպանները թե իրենց երկրներում, թե ծառայության վայրերում վստահաբար

Մայիսի 17-ին Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսը Ռուսաստանի և Նոր Նախիջևանի հայոց թեմի հրավերով մեկնեց Բելառուսի Հանրապետություն՝ մայրաքաղաք Մինսկում կառուցված հայկական եկեղեցու օծման առիթով:

Նորին Սրբության շքախմբի կազմում էին Մայր Աթոռի Արտաքին հարաբերությունների և արարողակարգի բաժնի տնօրեն Տ. Նաթան արքեպիսկոպոս Հովհաննիսյանը, Մայր Աթոռի դիվանապետ Տ. Արշակ արքեպիսկոպոս Խաչատրյանը, Մայր Աթոռ Սուրբ Էջմիածնի Միջեկեղեցական հարաբերությունների բաժնի տնօրեն Տ. Գարեգին վարդապետ Համբարձումյանը, Նորին Սրբության գավազանակիր Տ. Եսայի աբեղա Գրիգորյանը, Վեհափառ Հայրապետի հանձնակատար Տ. Գրիգոր աբեղա Մինասյանը, Կաթողիկոսական գրասենյակի տնօրեն Տ. Վահրամ ավագ քահանա Մելիքյանը և Մայր Աթոռի լուսարար Տ. Կոմիտաս քահանա Ղևոնդյանը:

Ամենայն Հայոց Կաթողիկոսին Մինսկի օդանավակայանում դիմավորեցին Ռուսաստանի և Նոր Նախիջևանի հայոց թեմի առաջնորդ Տ. Եզրաս արքեպիսկոպոս Ներսիսյանը, Բելառուսի Հանրապետության նախարարների խորհրդի կրոնի գործերով և ազգությունների հարցերով հանձնակատար Ալեքսանդր Ռումակը, թեմական խորհրդի ատենապետ Արամալիս Քամալովը, Բելառուսի հոգևոր հովիվ Արժանապատիվ Տ. Սարգիս քահանա Չոփուրյանը, թեմի եկեղեցականներ և համայնքի ներկայացուցիչներ: Դիմավորման հանդիսավոր արարողության ընթացքում ազգային տարազներով թա և բելառուս երիտասարդները Նորին Սրբությանը մատուցեցին ավանդական աղն ու հացը:

Նույն օրը Ամենայն Հայոց Կաթողիկոսը, ուղեկցությամբ պետական ու թեմական պաշտոնեության, այցելեց Մինսկի Հաղթանակի հրապարակ, որտեղ հուշարձանի առջև ծաղկեպսակի զետեղումից հետո աղոթք բարձրացրեց առ Աստված Հայրենական մեծ պատերազմում զոհված զինվորների հոգիների հանգստության և խաղաղության համար:


Մայիսի 18-ին՝ Սուրբ Խաչի երևման տոնին, Հայոց Հովվապետը շքախմբի ու Ռուսաստանի և Նոր Նախիջևանի հայոց թեմի առաջնորդ Տ. Եզրաս արքեպիսկոպոս Ներսիսյանի ուղեկցությամբ մեկնեց նորակառուց եկեղեցի:

«Հրաշափառ» երգեցողության ներքո Նորին Սրբությունը թափորով մուտք գործեց եկեղեցի՝ օրհնելով այս հիշարժան առիթով Բելառուսի տարբեր համայնքներից Մինսկ ժամանած հայորդիներին, ապա սկսվեց Բելառուսում կառուցված առաջին հայկական եկեղեցու օծման արարողությունը:

Հրմբաց սրբազան արարողության շարականների և սաղմոսների ներքո ջրով և զինով վազվեցին եկեղեցու Սուրբ Սեղանը, սյուները և մկրտության ավազանը: Այնուհետև «Հրաշափառ» շարականի ներքո խորան բարձրացվեց Սրբալույս Մյուռոնը, որով Ամենայն Հայոց Կաթողիկոսը կատարեց եկեղեցու Սուրբ Սեղանի օծումը: Ապա Եզրաս



Ամենայն Հայոց Կաթողիկոսի ձեռամբ օծվեց Մինսկի նորակառույց եկեղեցին



և Նաթան արքեպիսկոպոսներն օծեցին չորս ավետարանիչների անուններով խորանի սյուները, իսկ Արշակ արքեպիսկոպոսը՝ մկրտության սուրբ ավագանը: Օծման արարողության վերջում Վեհափառ Հայրապետը նորակառույց եկեղեցին կոչեց Սուրբ Գրիգոր Լուսավորիչ Հայրապետի անունով: Արարողությունն ամփոփվեց Հայրապետի «Պահպանիչ» աղոթքով, որից հետո բերկրառատ այս իրադարձության կապակցությամբ Ամենայն Հայոց Կաթողիկոսն իր հայրական պատգամն ու օրհնությունը բերեց Բելառուսի հայ համայնքին:

Նորին Սրբությունը գոհություն մատուցեց Աստծուն Բելառուսում առաջին հայկական եկեղեցու օծման բարեպատեհ առիթով՝ իր սերն ու շնորհավորանքները փոխանցելով ներկաներին: Իր խոսքում Վեհափառ Հայրապետը գնահատանքով արձանագրեց, որ Բելառուսի Հանրապետության իշխանությունների բարյացակամ վերաբերմունքի շնորհիվ հնարավոր դարձավ եկեղեցու վերխոյացումը, ինչը մեր աշխուժություն պիտի հավելի համայնքի ազգային-եկեղեցական կյանքին:

«Առանձնակի գոհումակություն է Հայրապետիս համար արձանագրել, որ մեր ժողովուրդների հարաբերությունները խարսխված են քրիստոնեական ինքնության ընդհանուր արժեքների, բարեկամության, հայրենիքի ու ընտանիքի ավանդական ընկալումների, ինչպես և միասնական մաքառումների ու սխրամքների թանկ հիշատակների վրա»,— ասաց Ամենայն Հայոց Կաթողիկոսը՝ հույս հայտնելով, որ Բելառուսում բնակվող հա-

յորդիների բարի անունն ու վարկը և տարբեր ոլորտներում արգասավոր գործունեությունը պիտի առավել սերտացնեն երկու ժողովուրդների բարեկամական կապերը և արդյունավորեց փոխշահավետ գործակցությունը:

Նորին Սրբությունը նաև անդրադարձ կատարեց տոնի խորհրդին և Տերունական Խաչի նշանակությանը: «Այս հրաշագարդ իրադարձությունը պանծացումն ու փառաբանումն է Քրիստոսի արյամբ նվիրագործված Սուրբ Խաչի: Խաչը քրիստոնյաներիս համար խորհրդանշին է հաղթության, նշանն է մահվան հանդեպ կյանքի հաղթանակի: Խաչը հոգևոր զենք է ընդդեմ չարի: Խաչը հանձնառություն է՝ արիաքար գործելու համուն ճշմարտության, ազատության ու արդարության: Կենարար Խաչը նաև Աստծու սիրտ նշանն է, որով մարդկանց շնորհվում է հարության երկնային պարզը»,— ասաց Հայոց Հայրապետը՝ ընդգծելով, որ կյանքի բոլոր հանգամանքներում Խաչը Քրիստոսի հետ լինելու և Նրան վկայելու, Նրա պատվիրաններով ապրելու ճանապարհն է:

Անդրադառնալով հայ ժողովրդի առջև Արցախի բռնազավթման հետևանքով ծառացած մերօրյա մարտահրավերներին՝ Նորին Սրբությունը հաստատեց, որ խաչի կենարար ուժի հանդեպ աներկբա հավատով է մեր ազգը դարերի ընթացքում դիմակայել բազում փորձություններին: «Մեր ժողովուրդը բազմիցս հալածվել է, ունեզրկվել, ցեղասպանվել, հայրենիքից բռնի տեղահանվել: Սակայն «Խաչ քո եղիցի մեզ ապաւն, Տէր Հիսուս»

սրտառուչ աղոթքը շուրթերին, առ Տերը հավատով շնորհ է գտել վերապրելու և ամենուր բարեկամ ազգերի ու երկրների զորակցությամբ ոտք կանգնելու ու իր նոր կյանքը կերտելու: Այսօր էլ փորձության մեջ են մեր հայրենիքն ու հայրենաբնակ ժողովուրդը: Բռնազավթված և հայաթափված է Արցախը, անապահով են Հայաստանի սահմանները: Աղբյուրացում ապօրինաբար պահվում են հայ ռազմագերիներ և Արցախի պատանդառված ղեկավարությունը, յուրացման և ոչնչացման վտանգի առջև է Արցախի հոգևոր-մշակութային բազմադարյա ժառանգությունը: Գիտենք, որ այս վշտագին իրողություններով խեղճված են նաև ձեր հոգիները, սակայն հավատում ենք, որ արդարությունը մեր ժողովրդի նկատմամբ պիտի վերականգնվի, և առ Քրիստոս հավատով կարող պիտի լինենք հաղթահարել ներկա բոլոր նեղություններն ու դժվարությունները: Նորած այս եկեղեցին իր հոգևոր առաքելությամբ բարձրորեն հնչեցնելու է սիրո և խաղաղության կոչը՝ ընդդեմ հակառակությունների, թշնամանքի ու չարակամության, և ազդու պատգամը՝ համերաշխ գոյակցության ու համագործակցության: Այս տաճարը կոչված է զորացնելու ձեր հավատքն առ Աստված, ամրապնդելու ոգին լավատեսության և հույսը լուսավոր գալիքի»,— նշեց Վեհափառ Հայրապետը՝ հորդորելով բելառուսահայ համայնքին աստվածաշնորհության ու ազգամիջոցով մարտնչականության մեջ պայքարելու, որը պատվարն է Բելառուսի հայորդիների միասնության, երաշ-

խավորը նրանց ինքնության և ազգային-հոգևոր արժեքների պահպանության:

Եկեղեցու օծման բերկրալի առիթով Ամենայն Հայոց Կաթողիկոսն իր օրհնությունն ու գնահատանքը հայտնեց Ռուսաստանի և Նոր Նախիջևանի բարեջան առաջնորդ Տ. Եզրաս արքեպիսկոպոս Ներսիսյանին՝ Բելառուսում եկեղեցական համայնքի ձևավորման տարիների հետևողական աշխատանքի համար, ինչպես նաև մորաճշմանակ հոգևոր հովիվ Տ. Սարգիս քահանա Չոփուրյանին՝ մաղթելով արդյունավետ ծառայություն Բելառուսի հայ համայնքում:

Նորին Սրբությունը նաև հայրապետական իր սերն ու օրհնությունը բերեց բարերար հայորդիներին՝ ի մասնավորի եկեղեցու հիմնադիր բարերարներ տիարք Աթուր և Մարեն Գրանց եղբայրներին, հովվատան և հայորդյաց տան բարերար տիար Վաղիմ Ավանեսյանին և աստվածահաճո գործին աջակցած բոլոր անձանց:

Վերջում Հայոց Հովվապետը Սուրբ Գրիգոր Լուսավորչի բարեխոսության հայցով խնդրեց Ամենակալից, որ մորաօծ եկեղեցուն հնչող աղոթքը լինի աղբյուր բարեպաշտ հայորդիների հավատքի պայծառության, երկնառաք շնորհների առատության, նրանց ընտանիքներից ներս մշտապես աստվածային օրհնությունների հեղման:

Արարողության ավարտին Նորին Սրբությունը մորաօծ տաճարին ընծայեց սրբանկար՝ Խաչելության պատկերով, նորակառույց եկեղեցու բարերարներ Գրանց Մարենին և Վաղիմ Ավանեսյանին շնորհեց Հայաստանյայց Առաքելական Սուրբ Եկեղեցու «Սուրբ Ներսես Շնորհալի» պատվո բարձր շքանշաններ, իսկ Ռուսաստանի և Նոր Նախիջևանի առաջնորդ Տ. Եզրաս արքեպիսկոպոս Ներսիսյանին ընծայեց պանակե:

Այնուհետև մորաօծ եկեղեցուն, ձեռամբ Ռուսաստանի և Նոր Նախիջևանի հայոց թեմի առաջնորդի, մատուցվեց Սուրբ և Ամնահ Պատարագ:

Եկեղեցու օծման արարողությանը ներկա էին Բելառուսի Հանրապետության նախարարների խորհրդի կրոնի գործերով և ազգությունների հարցերով հանձնակատար Ալեքսանդր Ռումակը, Համայն Բելառուսի Պատրիարքական փոխանորդ, Մինսկի և Ջասկավսկի միտրոպոլիտ Վենիամինը, պետական այրեր, քույր եկեղեցիների և կրոնական հարաբերությունների ներկայացուցիչներ, ազգային բարերարներ, թեմական խորհրդի անդամներ, հայրենիքից և տարբեր այլ երկրներից ժամանած ուսուսավոր հայորդիներ:

Սուրբ Պատարագի ավարտին կատարվեց մատաղի օրհնություն, օրը նշանավորվեց նաև ազգագրական պարերի կատարմամբ:

Նույն օրը եկեղեցու օծման պատմական առիթով տեղի ունեցավ պաշտոնական ճաշկերույթ, որի ընթացքում Հայրապետական օրհնության գրեթե հանձնվեցին եկեղեցու կառուցմանն իրենց աջակցությունը բերած հայորդիներին:

**Լրատվական նյութերը՝
Մայր Աթոռ Սուրբ Էջմիածնի
տեղեկատվական համակարգի**

Կարգալույծ է հռչակվել Տ. Զավեն վարդապետ Յազիչյանը

Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի հայրապետական տնօրինությամբ կար-

գալույծ է հռչակվել Վիրահայոց թեմի Մառնեուկի շրջանի հայոց հոգևոր հովիվ Տ. Զավեն վարդապետ Յազիչյանը:

Տնօրենության համար հիմք են ծառայել Վիրահայոց թեմի առաջնորդ Գերաշնորհ Տ. Կիրակոս եպիսկոպոս Դավթյանի դիմումը

և Կարգապահական հանձնախմբի եզրակացությունը Զավեն վարդապետ Յազիչյանի՝ հոգևոր ծառայության վայրն ինքնական լքելու

վերաբերյալ: Կարգալույծ եկեղեցականն այսուհետ կդասվի աշխարհականների շարքին՝ Սարգիս Յազիչյան ավագանի անունով:

Անկախության և պետականության խորհրդով

Պատմական իրողություններ և դեպքեր կան, որոնք անցնելի դրոշմ են թողնում տվյալ ժողովրդի կյանքում: Այդ իրողություններից մեկն է 1918 թ. մայիսի 28-ին Հայաստանի առաջին հանրապետության հռչակումը, որ մի նոր էջ բացեց մեր ժողովրդի պատմության մեջ:

Ներկայումս ամեն կերպ փորձ է կատարվում աղավաղելու և արժեզրկելու մայիսի 28-ի անկախության պատմական նշանակությունը մեր ազգային կյանքում, բայց փաստը մնում է անշրջանցելի. 1918 թ. մայիսի 28-ին հայ ժողովուրդն ավելի քան վեցհարյուրամյա ստրկությունից հետո կարողացավ բաղձալի անկախություն ձեռք բերել և վերականգնել հայոց պետականությունը:

Հայոց Ազգային խորհրդի պատգամավորներ Ավետիս Ահարոնյանի, Նիկոլ Աղբալյանի, Ալեքսանդր Խատիսյանի, Հովհաննես Քաջազնունու և նրանց գաղափարակիցների կողմից կատարված այս վճռական քայլը ճակատագրական նշանակություն ունեցավ մեր ազգային գոյաբանության հետագա ընթացքի համար: Ենթադրելի է, առաջին հանրապետությունը երկար չգոյատևեց, բայց այն դարձավ անկախության հենարան՝ հասնելու ազգային ինքնուրույնության, ազատ և ինքնիշխան պետականության վերահաստատման:

Միաժամանակ Մայիսի 28-ը մեր պատմության մեջ խոյանում է որպես հիշողության կոթող, որ մեր ժողովուրդը ևս կարողություն ունի պայքար մղելու հանուն իր ազգային անկախության և ինքնիշխանության: Ազատ և անկախ պետականության գոյությունը պահանջում է խիզախություն, քաջություն և զոհողություններ, իսկ մեր ժողովուրդն այդ իրավունքը վաստակել է իր արիությամբ և հանուն անկախության ամեն տեսակի զոհողությունների պատրաստակամությամբ:

Մեր ներկան, դժբախտաբար, ոչ այնքան լուսավոր է, ինչպիսին պետք է լիներ:

Մեր ներկան, դժբախտաբար, ոչ այնքան հաստատուն է, ինչի համար մեր նախնիներն ու ժամանակակիցներն իրենց կյանքը զոհեցին:

Մեր ներկան, դժբախտաբար, պարտավորական, հարմարվողական հոգեբանությամբ է շղարշված:

Մեր ներկան, դժբախտաբար, անտարբերությամբ, ուրացությամբ է լեցուն, և այն, ինչ մեզ մատուցվում է, ընդունում ենք առանց ոչ մի ըմբոստության: Սևը՝ սպիտակ, հինը՝ որպես նոր է մատուցվում, և մենք, փոխանակ հանուն արդարության պայքարը շարունակելով, հարմարվում ենք, կեղծ օրակարգերի համար զիջում անգիջելի, նույնիսկ մեր աշխարհահայացքն ենք փոխում, այնինչ այսօր



Հայկական բանակի օրհնումը Սարդարապատի ճակատամարտից առաջ, 1918 թ.

առավել, քան երբևէ, կարիք ունենք զորավոր դառնալու, խորագիտակ լինելու մեր պատմությանը, մեր անցյալին, որ կարողանանք հաստատուն հիմքերի վրա պահել ներկան՝ ապագան չվտանգելու համար:

Այսօր ավելի, քան երբեք, կարիք ունենք ՍԻԼԻԿԱՆՆԵՐԻ և ՆԱԶԱՐԲԵԿԱՆՆԵՐԻ, ՆԺԴԵՅՆԵՐԻ և ԱՆԴՐԱՆԻԿՆԵՐԻ՝ արթնանալու անկում տանող խոր թմբիկից և վերադառնալու մեր շեղված ընթացքը: Ահավասիկ, երևանի զորամասի հրամանատար, զորավար Մովսես Սիլիկյանի կոչը՝ «Դեպի սրբազան պատերազմ», որն այսօր հնչում է նույնքան տագնապահարույց, որքան այն օրերին.

«Հայեր.

Շտապեցե՛ք հայրենիքն ազատելու:

Հասել է ընթացք, երբ յուրաքանչյուր հայ, մոռանալով իր անձնականը, հանում Մեծ Գործի՝ հայրենիքի փրկության և իր կնոջ ու աղջիկների պատվի պաշտպանության, պետք է գործ դնի իր վերջին ճիգը՝ թշնամուն հարվածելու համար:

Մենք չէինք ուզում կռվել. հանուն խաղաղության ու հաշտության պատրաստ էինք ընդառաջ գնալու ամեն տեսակ զոհողությունների, սակայն մեր նամարը թշնամին ընթանում է իր ծրագրած ուղիով. նա, ըստ երևույթին, ստրկացնել է ուզում մեզ, իրոք, ուզում է ոչնչացնել մեր բազմաշարժար ազգը: Բայց քանի որ պիտի ոչնչանանք, ավելի լավ չէ՞, որ զենքը ձեռքներինս փորձենք պաշտպանել մեզ: Գուցե հաջողվի մեծ կռվով ձեռք բերել ապրելու իրավունքը:

Իսկ որ մենք կարող ենք պաշտպանվել, այդ ցույց տվին վերջին կռիվները մեր ճակատում, ուր մեզանից թվով գերազանց

թշնամին նահանջի է դիմել մեր հերոսական զորքի առաջ:

Հարկավոր է մի ճիգ ևս, և թշնամին վռնդված կլինի մեր երկրի սահմաններից, ուր մեր պապերն ու հայրերը երկար տարիներ արյուն-քրտինքով աշխատել են, զեթ մի կերպ հայթայթել իրենց օրվա ապրուստը:

Հայեր,

Ժամանակ չէ դանդաղելու: Մինչև հիսուն տարեկան բոլոր տղամարդիկ պարտավոր են զենքի տակ գալու. ես պահանջում եմ ամենքից մերկայանալ իրենց զենքերով ու փամփուշտներով հայրենիքի պաշտպանության համար:

Հայրենիք.

Հիշեցե՛ք հինգերորդ դարի փափկասուն տիկնանց, որոնք ոգևորեցին իրենց ամուսիններին դեպի Մեծ Գործը անմահ Վարդանի կռիվների ժամանակ. հետևեցե՛ք նրանց օրինակին, եթե չեք ուզում, որ ձեր պատվը ոտնակոխ լինի, խրախուսեցե՛ք այն վախկոտներին, որոնք զանազան պատրվակներով խուսափում են ճակատ գնալուց: Հավաքեցե՛ք ռազմամթերք, հաց, հագուստ և ուրիշ մթերքներ...

Խորին կերպով համոզված եմ, որ իմ այս կոչը անարձագանք չի մնա, և երկու-երեք օրվա ընթացքում կկազմակերպվի մի այնպիսի քաջարի զորաբանակ, որին կհաջողվի վռնդել թշնամուն հայրենի հողի սահմաններից և ապահովել հայ ժողովրդի գոյությունը: Հանուն բազմաշարժար ժողովրդի ֆիզիկական գոյության,

Հանուն ոտնակոխ եղած ճշմարտության, Ողբի կանգնեցե՛ք: Դեպի՛ սրբազան պատերազմ»:

Այո, այս կոչն ուղղված է նաև այսօրվա հայությանը՝ պաշտպանելու և պահպանելու հայրենիքը՝ այն սրբազան հողը, որ ոռոգվել է մեր հերոս նախնիների և մեր ժամանակի հայորդիների արյամբ:

Ժամանակն է, որ մեզանից յուրաքանչյուրն իր անձնական շահը մի կողմ դնի և խորհի ու գործի հայրենիքի շահի համար, իր ներդրումն ունենա այսօրվա Հայաստանի հզորացման գործում:

Հայտնի ճշմարտություն է՝ եթե ուզում ես հաղթել արտաքին թշնամուդ, նախևառաջ պիտի հաղթես ներքին թշնամուդ: Այլ խոսքով՝ մենք մեր միջից պետք է հեռու վանենք յուրայինի հանդեպ ատելությունը, քիմախմբությունը, չարությունը, եսականությունը, անպատասխանատվությունը, պետք է ի մի հավաքվենք՝ դիմագրավելու համար մեր հայրենիքի առջև ծառացած գոյաբանական սպառնալիքներին, պահպանելու մեր ինքնիշխան պետականությունը:

Մեր փափկասուն տիկնաները ևս ունեն իրենց ուսերին դրված պարտավորություններ, որոնցից գլխավորը բարոյական սերունդ կրթելն ու դաստիարակելն է, այնպիսի սերունդ, որ կճանաչի իր պատմությունը, կըմբռնի այն մեծ ժառանգության արժեքը, որ իր պապերն ավանդ են թողել իրեն, կգիտակցի հայրենիքի և Հայ եկեղեցու գործունեությունը ու դերակատարությանը բոլոր ժամանակներում, ինչպես նաև պատրաստական կլինի և գիտակից կերպով կզոհի իր անձնականը հանուն ընդհանուրի:

Այս է ընթացքը դեպի անկախություն և այդ անկախությունը պահելու: Միշտ պետք է հիշենք, որ անկախությունը չի տրվում, այն պետք է նվաճել (Գարեգին Նժդեհ), այլ խոսքով՝ մեր անկախությունը ուրիշները չէ, որ պետք է պահպանեն, այլ մենք պետք է պաշտպանենք այն՝ հայրենիքի հանդեպ ունեցած մեր պարտավորությունների ամենացորդ կատարմամբ, անձվիրաբար ծառայելով նրա շահերին ու բարօրությանը:

Մայիս 28-ը մեր նորագույն պատմության այն փառապանծ թվականն է, որ մեզ տալիս է այդ ոգին, և մոռանալ այդ թվականը նշանակում է հրաժարվել մեր անկախ լինելու սկզբունքից ու իրավունքից: Պետք չէ մոռանալ, որ «այն ժողովուրդները, որոնք մոռանում են իրենց ազատությունը, անխուսափելիորեն կորցնում են այն» (Գևորգ Չառլզ): Ուզում ենք չկորցնել մեր անկախությունը, ուրեմն ստվերի տակ չպահենք 1918 թ. մայիսի 28-ը, այլ դասեր քաղենք, որ կարողանանք արժանապատվորեն շարունակել մեր գոյության ընթացքը:

Վարանդ (Հակոբ) ՔՈՐԹՍՈՍԱՆ

Ատրպատականի թեմակալ առաջնորդ Ներսես Մելիք-Թանգյանի ազգանվեր գործունեությունը 1914—1921 թթ.

Նայ քաջարի ու գաղափարական հոգևորականների շարքում առանձնանում է Ատրպատականի թեմի առաջնորդ Ներսես Մելիք-Թանգյանը: Մեծ է նրա դերը ոչ միայն պարսկահայության ազգային-եկեղեցական ու կրթական կյանքի կազմակերպման գործում, այլև համահայկական նշանակության իրադարձությունների բովում: Հայոց պատմության ամենադժվար ու վճռական պահերին նա ցուցաբերեց հոգևորականին և իսկատիպ առաջնորդին վայել մարդասիրական վարք, շրջահայեցություն, անհողդող կամք ու քաջություն՝ իր արժեհամակարգում միշտ բացարձակ պահելով երկու գաղափար՝ հայրենիքն ու քրիստոնեությունը:

Ներսես Մելիք-Թանգյանի գործունեությունը պատմական է եղել 1914—1918 թթ. հայ գաղթականությանն օգնելու, նրանց վերադարձը կազմակերպելու, Չանգեզուրի ինքնապաշտպանությանը զորակցելու և խորհրդային հալածանքներից ու բռնաճնշումներից իրանում ապաստանած դաշնակցականներին պաշտպանության տակ առնելու առումով:

1914—1918 թթ. գաղթականության կենսական կարիքները հոգալու համար հայրենամ-

վեր եկեղեցական-հասարակական գործիչը, ըստ ժամանակակիցների, շարունակել էր իր փնտրում, բոլոր դռները բախում և անհրաժեշտ միջոցներ գտնում: Պաշտոնական մարմիններին դիմելուց բացի՝ նա շրջում էր Ատրպատականի և Սիսիանի գյուղերում՝ հորդորելով գյուղացիներին իրենց ունեցած պարենամթերքն ու դրամը կիսել գաղթականների հետ. «Նա բացառիկ անձնվիրությամբ և վարչական հմտությամբ ծառայում էր իր հոտին,— հիշում է Սիմոն Վրացյանը:— Նրա օրոք Ատրպատականի թեմը մեծ առաջադիմության մեջ էր, երբ վրա հասան մեծ պատերազմը և 1914 թ. դեկտեմբերյան աղետավոր նահանջը: Ուրմիո և Սալմաստի հայությունը ամբողջապես տեղահան եղավ: Թավրիզեցիներից էլ ով հնարում էր, անցավ Կովկաս: Ներսես սրբազանը աղետահար ժողովրդի մեջ էր՝ նրա հետ բաժանելով ամեն նեղություն: Նրա ջանքերով կազմվեցին նպաստամատույց մարմիններ, նյութական միջոցներ հայթայթեցին, և թե՛ գաղթի ճանապարհին և թե՛ գաղթավայրերում ուտելիք, հագուստ և հաց տրվեց կարիքավորներին» («Յուշամատենատ. Ներսես արք. Մելիք-Թանգեանի», Թեհրան, «Ալիք» տպ., էջ 42):

1914 թ. դեկտեմբերին, երբ Ատրպատականի ռուսական զորամասը նահանջում է, և քրիստոնյա ազգաբնակչությանն առաջարկվում է կոտորածների չենթարկվելու համար զորքի հետ միասին փոխադրվել Ջուլֆա, գաղթի օրերին բոլորը՝ ռուս և ասորի, կաթոլիկ և բողոքական հոգևորականները, անտերության մատնելով իրենց ժողովրդին այդ ծանր, օրհասական օրերին, անցնում են Ռուսաստան, մնում է միայն Ատրպատականի հայոց թեմակալ առաջնորդ Ներսես եպիսկոպոսը՝ առանց ազգային ու կրոնական խտրականության ստանձնելով գաղթականության փրկությունը:

1915 թ. ապրիլին՝ Սալմաստի 2-րդ գրավումից հետո, Ներսես Մելիք-Թանգյանը գնում է Խոյ, Սալմաստ և Ուրմիա՝ իրավիճակին ծանոթանալու և գաղթականության վերադարձը կազմակերպելու: Իսկ 1915 թ. հուլիսի վերջերին, երբ սկսվում է Վանի բռնազաղթը, նա Թավրիզից անմիջապես մեկնում է Սալմաստ՝ գաղթականությանը սնունդ ապահովելով և տեղավորելով: 1917 թվականին, հավանաբար նկատի ունենալով Ատրպատական գաղթած վանեցիների խնամքը կազմակերպելը, Գևորգ Ե

Ամենայն Հայոց Կաթողիկոսը նրան նշանակում է նաև Վասպուրականի հայոց թեմակալ առաջնորդ:

1918 թ., երբ թուրքերը ներխուժել էին Ատրպատական, Ներսես արք. Մելիք-Թանգյանի հեռատես գործունեության, մասնավորապես՝ Իրանի կառավարության հետ խոհեմ, շրջահայաց դիվանագիտության և իր դիրքի ու հեղինակության շնորհիվ Թավրիզի հայությունը փրկվեց կոտորածներից: Նա անմիջապես դիմում է հղել պարսից շահին և Իրանում ԱՄՆ-ի դեսպանին՝ խնդրելով իրենց պաշտպանության տակ առնել հայերին: Եվ պարսից բարձրաստիճան պաշտոնյաներն ու ժողովրդական լայն զանգվածները պաշտպանեցին տեղի հայերին՝ թույլ չտալով թուրքերին հասնել իրենց նպատակին:

Առաջին աշխարհամարտի զինադադարից հետո, երբ թուրքերը հետ քաշվեցին Թավրիզից, Մակուում, Խոյում՝ հարևան պարսիկների մոտ, և Ս. Թադեի վանքում ապաստանած հայերն սպասում էին յուրայինների օգնությանը, և առաջնորդարանը՝ Մելիք-Թանգյանի գլխավորությամբ, շտապում է մահից փրկելու և պատսպարելու նրանց: ➔ էջ 8

Քաջությունը որպես առաքինություն Աստվածաշնչում

«Ոչ թե զենքերն են հաղթում, այլ Աստծո օգնությունը: Եթե Աստված չօգնի, զուր են բոլոր սպառազինությունները»:

Ս. Յովհաննես Ոսկեբերան

Քաջության օրինակներ մեր կյանքի ընթացքում շատ ենք տեսնում: Քաջություն կարող ենք համարել այն հատկությունը, երբ վտանգներից չընկրկելով՝ անգամ կյանքը զոհելու պատրաստակամությամբ հերոսը գործում է նպատակին հասնելու համար: Քաջությունը կարող է դրսևորվել երկու ձևով՝ բարոյական և ֆիզիկական, կարող է արտահայտվել նաև միաժամանակ: Քաջությունը՝ որպես բարոյահոգեբանական հատկանիշ, դրսևորվում է ամենից շատ պատերազմի դաշտում, երբ կյանքի համար խիստ վտանգավոր իրադրությունում զինվորականը կատարում է մարտական խնդիրը՝ ոգեշնչման օրինակ դառնալով մյուսների համար:

Աստվածաշնչում քիչ չեն քաջության օրինակները, և մեր Տերն Ինքն է մղում մեզ քաջագործությունների: Քաջությունը բացառապես և անկասկած քրիստոնեական առաքինություն է, քանի որ Քրիստոս ասում է. «Չկա ավելի մեծ սեր, քան այն, որ մեկն իր կյանքը տա իր բարեկամների համար» (Յով. 15:13):

Աստծո հանդեպ հավատն ու անչափ վստահությունը սուրբգրային հերոսների հոգում առաջացրել է վախճ հաղթահարելու ուժ և մղել հիշատակման արժանի գործերի: Յիմ Կտակարանում որպես այդպիսին կարող ենք մշել, օրինակ, Դավիթ թագավորի հաղթանակը Գողիաթի դեմ: Դավթի քաջությունը ծնվում է ոչ թե նրա ֆիզիկական կարողությունից, այլ Աստծո հանդեպ վստահությունից. նա առանց վախի դուրս է գալիս հսկա Գողիաթի դեմ՝ հայտարարելով. «Տերը քեզ այսօր իմ ձեռքը կմատնի...» (Ա Թագ. 17:46): Եվ Դավիթը պարսատիկով ու քարով հաղթում է Գողիաթին, որից ահաբեկվում էին բոլորը, մի հարվածով գետնա-



Նիկոլա Կորդիե. Դավիթ արքա, XVII դ., Յոն, Սանտա Մարիա Մաջորե բազիլիկ եկեղեցի

հարում ու դաշույնով սպանում նրան. «Դավթի ձեռքին, սակայն, սուր չկար, ուստի Դավիթը վազեց, կանգնեց այլազգու վրա, բռնեց նրա սուրը, բռնելով քաշեց հանեց պատյանից, սպանեց ու գլխատեց նրան: Երբ այլազգիները տեսան, թե իրենց հզոր մարդը մեռավ, փախան» (Ա Թագ. 17:51):

Աստվածաշնչյան այս դրվագը հիշեցնում է «Սասնա ծռեր» էպոսում Սասունցի Դավթի ու Սարա Մելիքի մեռածարտը և Դավթի հաղթանակը:

Քաջության մի այլ հրաշալի օրինակ է Դանիել մարգարեի կամ նրա ընկերների անվախ կեցվածքը Նաբուգոդոնոսոր և Դարեհ արքաների առջև, երբ նրանք ոչ մի պարագայում չեն խոնարհվում կուռքերի առաջ, վստահ, որ ամենակարող Աստված ամեն ինչից կփրկի իրենց: Դանիելի ընկերները փրկվում են կրակի բովից, իսկ Դանիելը՝ առյուծների երախից: Թագավորական հրամանով մետվելով առյուծների գուլը՝ Դանիել մարգարեն չվարանեց, տատանումներ չունեցավ նրա հավատը, ինչպես որ նրա ընկերները կրակի բովի մեջ շարունակեցին

հավատալ Աստծուն: Եվ երբ Դարեհ արքան, որ շատ էր սիրում ու գնահատում Դանիելին, հաջորդ առավոտյան անձամբ զնաց զուբի մոտ՝ վստահ, որ առյուծները հոշոտել են նրան, և նրա մահը սգալու, շատ ուրախացավ կենդանի տեսնելով: «Դանիել, Աստծո ծառա, արդյոք քեզ քո Աստվածը, որին դու միշտ պաշտում էիր, կարողացավ ազատել առյուծների երախից» (Դան. 6:20),– տխրությամբ ձայնում է արքան վերկից: Եվ զուբից լսվում է Դանիելի պատասխանը. «Արքա, հավերժ ապրիր, քանի որ իմ սիրտը ուղիղ էր Նրա առջև, և քո դեմ էլ որևէ հանցանք չեմ գործել, Արքա, իմ Աստվածը Իր հրեշտակին ուղարկեց, և նա փակեց առյուծների երախը, և նրանք ինձ չվնասեցին» (Դան. 6:21–22):

Քաջությունը՝ որպես առաքինություն, արտահայտված է նաև Նոր Կտակարանում: Յիսուս Քրիստոս Իր աշակերտներին ասում է. «Մի վախեցեք նրանցից, որ մարմինը սպանում են, բայց հոգին սպանել չեն կարող...» (Մատթ. 10:28): Իսկ առաքյալները, այս խոսքերի անմնացորդ հետևորդը լինելով, քաջաբար բարոգում են Քրիստոսի Ավետարանը՝ դիմանալով հալածանքներին, բանտարկումներին, քարկոծումներին, չվախենալով մահից: Պողոս առաքյալը Տիմոթեոսին գրած իր նամակում ասում է, որ Ավետարանի քարոզչություն չարչարանքների պես է մասնակից լինելու և չամաչել վկայել Տիրոջ մասին և այդ ամենն անել Աստծո զորությամբ, քանի որ «Աստված մեզ չտվեց երկշտության հոգի, այլ՝ զորության, սիրո և զգաստության» (Բ Տիմ. 1:7):

Աստվածաշնչում քաջությունը ներկայացվում է որպես շնորհ, որն Աստված պարգևում է հավատացյալներին: Դա ներքին վստահություն է, որը բխում է Աստծո ներկայության զգացումից: Այն ենթադրում է բացարձակ սեր ու հավատ Աստծո հանդեպ, որ Նա առաջնորդում ու պահպանում է, և այդ զգացումն է, որ ուժ է տալիս, լսելի դարձնում մի ներքին ձայն. «Պետք չէ երկմեջև ոչնչից և ոչ մեկից»: Քաջ լինել նշանակում է գոր-

ծել հավատքով, նույնիսկ երբ ընթացքն անհայտ է:

Քաջության դրսևորումներից բացարձակ է հայրենիքի համար կատարված քաջությունը: Մեր եկեղեցու բազմավաստակ հայրապետներից Սուրբ Ներսես Շնորհալիմ ասում է. «Ով որ սիրով ծառայում է իր հայրենիքին, նա ծառայում է նաև Աստծուն, քանզի Աստված ամենքին կարգել է սիրել իրենց ծննդավայրը»: Այս գաղափարը մենք տեսնում ենք Յիմ Կտակարանի էջերում, երբ Աստված խորալեզանքներին առաջնորդում է դեպի Ավետյաց երկիր:

Յնգամատյանում հանդիպում ենք բազմաթիվ տողերի, որտեղ Տերը Մովսեսին և խորալեզանքներին հորդորում է չվախենալ և չերկմտել այլազգի թշնամիներից և միայն ապավինել Աստծո զորությանը՝ հաղթության հասնելու համար: «Երկրորդ Օրենք» գրքում ասվում է. «Քաջ եղիր ու զորացիր, մի երկմտիր ու մի վախեցիր, մի զարհուրիր նրանց ներկայությունից, քանի որ քո Տեր Աստվածն Ինքը պիտի գնա ձեր առջևից, ձեր մեջ: Նա չի լքելու ձեզ ու չի անտեսելու ձեզ» (Բ Օր. 31:6): Իսկ Յեսուի գրքում ասվում է. «Ահա ես պատվիրում եմ քեզ՝ քաջ եղիր և արի, մի վախեցիր և մի սարսափիր, որովհետև քո Տեր Աստվածը քեզ հետ է ամենուրեք, ուր որ գնաս» (Յեսու 1:9): Սակայն խորալեզանքներն արտում տեղ էին գտնում անհավատությունը, տրտմուքը ու ապստամբությունը, որոնց պատճառով էլ ենթարկվեցին անպատում տանջանքների, իսկ եթե սրտով մաքուր և հոգով արի լինեին, հետևեին Աստծո պատգամներին և անտրտունջ կատարեին, ավելի վաղ կհասնեին խոստացված երկիրն ու կվայելեին այնտեղի բարիքները:

Յայ ժողովրդի պատմության մեջ քաջությունը դրսևորվել է որպես անձնագոհ, անմնացորդ պայքար հանուն ազգային գոյության, հայրենիքի և հավատքի պաշտպանության: Քաջության դասական օրինակներով հարուստ է մեր ժողովրդի պատմությունը: Յիշենք միայն Վարդանանց և Վահագնանց դիմադրությունները, պայքարն արաբների դեմ

800-ական թվականներին, հայոց դիմադրությունները մոնղոլների, սելջուկ թուրքերի արշավանքների դեմ, Ջեյթունի պաշտպանությունները, Սարդարապատի, Բաշ Ապարանի և Ղարաբաղիսայի հերոսամարտերը, Սյունիքի պաշտպանությունը, Արցախյան ազատամարտը.... Քիչ չեն նաև այն անհատ հերոսները, որոնք վճռորոշ պահերի կարողացել են համախմբել և առաջնորդել ազգի գոյության ընթացքը. Վարդան Մամիկոնյան, Գևորգ Մարգաբետունի, Անդրանիկ Օզանյան, Գարեգին Նժդեհ, Սոնթե Մելքոնյան, սերունդների մի ողջ փառանգ, որ հասնում է մինչև մեր օրերը:

Այսօր՝ սարդարապատյան այս օրերին, մեր ժողովուրդը կարիք ունի հետ մալելու և վերհիշելու իր հերոսական պատմությունը, հիշելու և իր աչքի առջև մշտապես որպես փարոս ունենալու Մայիսյան հերոսամարտերը՝ քաջության և անձնվիրության բարձրագույն օրինակներ, երբ հայ ժողովուրդը համախմբվելով՝ անկարելի կարելի դարձրեց և հաղթելով թշնամուն՝ վերահաստատեց իր գոյության իրավունքը: Սարդարապատի հերոսամարտերը կարող ենք համենմատել Դավթի՝ Գողիաթի դեմ տարած հաղթանակի հետ. թվապես և տեխնիկապես թույլ կողմի հաղթանակը սպառազեն և բազմահազարանոց թշնամու հանդեպ՝ արդար նպատակի համար:

Աստվածաշնչյան քաջությունը ժամանակակից մարդուն հիշեցնում է, որ հավատքն ու վստահությունն Աստծու հանդեպ այն հիմքն են, որի վրա կանգնած մարդը կարող է դիմակայել վախին, փորձություններին, սպառնալիքներին, մահվանը: Քաջ լինել նշանակում է մնալ Աստծո կամքի հետ՝ անկախ հանգամանքներից: Դա մարդկային ուժով չէ, այլ Սուրբ Յոգու ներգործությամբ, ինչպես ասում է սաղմոսեզոգուն. «Տերն իմ լույսն է ու կյանքը, ռժից վախենան. Տերն իմ կյանքի ապավենն է, ռժից ես դողամ (Սաղմոս 26:1):

Գայանե ԶԻԼԱՎՅԱՆ
Գևորգ սրկ. ԴԵՐՄԵՆՁՅԱՆ

ՔՐԻՍՏՈՆՅԱ ԲԱՐԵԿՐԹՈՒԹՅՈՒՆ

Սուրբ Խաչի երևման տոնը

Նայ Առաքելական Սուրբ Եկեղեցին Խաչի երևման տոնը նշում է Յիմանց հիմնդիրը կիրակի օրը՝ Սուրբ Չատկից 28 օր հետո՝ 35 օրվա շարժականությամբ: Այս տոնը կատարվում է ի հիշատակ փրկչական Խաչի հրաշալի երևման, որի պատմական ծալքերը հասնում են մինչև 351 թվականը: Երուսաղեմում այդ տարվա մայիս ամսին՝ ճիշտ Յոգեգալստյան տոնին՝ օրվա երրորդ ժամին (9:00-ին), երկնքում երևում է Փրկչի ամենահաղթ Խաչի նշանը՝ աստվածաբուխ լույս տարածելով Գողգոթայից մինչև Ձիթենյաց լեռը:

Խաչի ամենկեցի երևման ակամատեսներից Կյուրեղը՝ Երուսաղեմի հայրապետը, այս առթիվ հատուկ նամակ է հղում Բյուզանդիայի Կոստանդին Բ կայսրին, որտեղ, վկայակոչելով Խաչի երևումը, հորդորում է ամուր մնալ քրիստոնեական ուղղափառ հավատքին, Ընդհանրական Եկեղեցու որդեգրած դավանանքի անհերքելի ճշմարտություններին: Նա այսպես է նկարագրում այս սքանչելի իրադարձությունը. «Եվ որովհետև Ս. Խաչափայտն արեգակից ավելի հզոր իր ճառագայթներն էր մատու-

ցում տեսնողներին այն աստիճան, որ աստվածտեսության երկյուղով և ուրախությամբ բռնված՝ քաղաքում բոլորն անխտիր շտապում էին եկեղեցի. մանուկներն ու ծերերը, տղամարդիկ և կանայք, բոլոր տարիքի մարդիկ, մինչև իսկ տնարգել աղջիկները, բնիկները և օտարները, քրիստոնյաները և այլ տեղերից եկած ազգերը: Բոլորը միահամուռ, միաբերան օրհնում էին մեր Տեր Յիսուս Քրիստոսին՝ Աստծո Միածին Որդուն՝ Սխրագործին»: Կյուրեղ Երուսաղեմացու այս նամակը 5-րդ դարում թարգմանվում է հայերեն: Նամակի ամբողջական տարբերակն առկա է Ճաշոց ծիսական մատյանում և ընթերցվում է Խաչի երևման տոնին:

Նույն ժամանակաշրջանում արիոսականության հերետիկոսական ուսմունքը, ըստ որի՝ Քրիստոս կատարյալ Աստված չէ, մեծ իրարանցում և պառակտում էր առաջացրել ամբողջ կայսրությունում: Նույնիսկ 325 թվականին՝ Նիկիայի առաջին տիեզերական ժողովից հետո, շատերը հրապուրվել էին այս կեղծ վարդապետությամբ: Քրիստոնեական վաղ շրջանի եկեղեցական պատմիչ Սոգոմե-

նը գրում է, որ այս հրաշքի շնորհիվ շատ հեթանոսներ և հրեաներ եկան դեպի քրիստոնեությունը: Յիրավի, Խաչի տեսիլքը զորացրեց ոչ միայն ուղղափառ հավատացյալներին, այլև նպաստեց, որ բազմաթիվ արիոսականներ եկեղեցու գիրկը վերադառնան:

Յայ հնամենի պատմության մեջ էլ քիչ չեն եղել Խաչի երևումները: Սուրբ Կորյունը և քերթողահայր Մովսես Խորենացին Յայ եկեղեցու վարդապետ Մեսրոպ Մաշտոցի մահվան և թաղման կապակցությամբ արձանագրում են, որ Վաղարշապատ քաղաքում օրեր շարունակ Խաչի լուսապայծառ նշանը փայլել է հենց այն տան վրա, որտեղ սուրբն ավանդել էր իր հոգին:

Այսպես՝ Տիրոջ խաչելությամբ և հարության բաժանման արդյունքում կյանքի փրկության և աստվածաճանաչողության սուրբ խորհուրդը, որով արարչագործության թագն ու պսակը՝ մարդը, հնարավորություն է ստանում նոր արարած լինելու. «Եթե մեկը Քրիստոսի մեջ է, ապա նա նոր արարած է» (Բ Կորնթ. 5:17): Քրիստոս, խաչափայտին գամվելով, ջնջում է մեր մեղքերի պարտամուրհակը՝

մախանշելով ավել ճանապարհը, որով պետք է քայլի սուրբ մարդը: Կյուրեղ Երուսաղեմացին ասում է. «Դավանում եմ Խաչը, քանզի գիտեմ Յարությունը»: Յետևաբար՝ խաչը մեզ համար հույսի, սիրո, հաղթանակի, փրկության և պարծանքի նշան է. «Քավ լիցի, որ ես պարծենամ այլ բանով, քան մեր Տեր Յիսուս Քրիստոսի խաչով» (Գաղ. 6:14): Ս. Յովհան Ոսկեբերանը, Աստծո շնչով լցված, գրում է. «Խաչը մեր փրկության նշանն է, Խաչը քրիստոնյաների հույսն է, Խաչը եկեղեցու հիմքն է, Խաչը սատանայի պարտությունն է, Խաչը որբերի հայրն է, Խաչը ամբարիշտների դատավորն է, Խաչը հիվանդների բժիշկն է, Խաչը օրվա զենքն ու գիշերվա պահպանիչն է, Խաչը ծարավողների աղբյուրն է, Խաչը լույսն է խավարում մատածների և ազատագրում գերվածների, Խաչը ամբոթեմի տապալումն է»:

Խաչի երևման տոնը հիշարժան է քրիստոնյաներիս համար: Այն խորհրդաբար վերահաստատում է Քրիստոսի մշտամնա և ամոքիչ ներկայությունը մարդկային կյանքում: Պատգամում է, որ մենք էլ Խաչին՝ խաչյալ և հա-

րուցյալ Քրիստոսին ապավինելով՝ Գողգոթայի տառապալից ճանապարհից դուրս գանք և Ձիթենյաց սուրբ լեռանն արժանանանք, որտեղից համբարձվեց հաղթանակած, փառավորյալ Տերը:

Այսօր մեր կյանքն ամբողջովին լույսի և խավարի հակադիր պայքար է, և Խաչի երևման տոնը մեզ հիշեցնում է, որ Աստծո լույսը կարող է ճեղքել ցանկացած խավար: Երուսաղեմում բնակվողների նման մենք այսօր կոչված ենք տեսնելու այդ լույսը, ապրելու և սրբացվելու դրանով:

Այս դժնդակ օրերի խավար աղջամուղջի մեջ մեզ միայն մնում է սկեռնուն հայացքով նայել ճշմարիտ Լույսին՝ Քրիստոսին, և շարականաստեղծ բառերով աղաղակել. «Որ ծագեցեր մեզ լույս մեծ զնշան յաղթութեան Խաչի Քո, Թագաւոր յաւիտեանից, եւ ետուր պարիսպ ամրութեան հաւատացելոց Քոց, աշտարակ հզօր յերեսաց թշնամւոյն, աղաչեմք զՔեզ, Տէր, պահպանեմ զմեզ ընդ հովանեալ Խաչի Քո սուրբ»:

Ելենա ՄՐԱՍԽԱՆՅԱՆ
Յայկ սրկ. ՍԱՐԳՍՅԱՆ

Արարչագործությունը և մարդը

Հարցազրույց Տ. Իսահակ վրդ. Պողոսյանի հետ

— **Հայր Սուրբ, երբևէ հայտնի մեծագույն ստեղծագործությունը՝ արարչագործությունը, Աստծո կողմից աշխարհաստեղծումն է։ Ո՞րն է արարչագործության ընթացքի խորհրդաբանությունը:**

— Հարցադրումը չափազանց լայն ուղեծիր ունի, այդուհանդերձ, եթե համառոտ ձևակերպենք, Աստված նախագետ է և իրերի բնությունը տեսնում է նախքան նրանց լինելությունը: Համաձայն քրիստոնեական ուղղափառ ընկալման՝ Աստված և՛ արարիչ է, և՛ բոլոր գոյերի սկզբնապատճառը. աշխարհն ստեղծել է ոչ թե ինչ-որ պատճառով կամ ստիպված, այլ կամավորաբար, կարգավոր ու նպատակադիր: Ծննդոց գրքի Ա 1—19-ը, ըստ էության, հանդիպման նկարագրություն է, հանդիպում Աստծո էության և գործունեության, Աստծո և Աստծո գոյության խորհրդի, ոգեղենի և նյութեղենի միջև: Այդ հարաբերության մեջ տեսանելի են և՛ Աստծո՝ Արարիչ լինելու հանգամանքը, և՛ Աստծո արարչագործության ամսահմանությունը: Աստծո արարչության հիմքը բացարձակ սերն է, արարչությունն Աստծո դժգույն և թույլ արձագանքը չէ, ինչպես պատկերացնում էին պատմականները, այլ կատարելապես մոր ստեղծագործություն: Այն Աստծո հավիտենական գործության ճշմարիտ արտահայտությունն է, Նրա բազմախորհուրդ մտքի արտաքին իրականացումը:

Քրիստոնեական մտածողության մեջ Աստված և՛ արարիչ է, և՛ օրենսդիր, և՛ սահմանադիր: Արարչագործության մեջ ամեն բան կատարյալ աստիճանի ներդաշնակված և կարգավորված է խորհրդանշական բովանդակությամբ: Աստծո և արարվածի միջև գոյություն ունի ինչպես սկզբունքային տարբերություն, այնպես էլ նմանություն:

Արարչագործությունը բազում խորհուրդներ ունի. արարչագործության բազմազանությունն ու գեղեցկությունը բացահայտում են Աստծո կատարելությունն ու սքանչելիքները: Խորհրդաբանական իմաստով՝ տիեզերքը դիտարկվում է իբրև գիրք, «ամերևույթ աստվածային աշխարհի խորհրդանշան»: Դիցուք՝ երկնքի բարձրությունն ու հեռավորությունը խորհրդանշում են Աստծո անմատչելիությունը, երկնքի լայնարձակությունը՝ աստվածային սիրո անսպառնալիքությունը, պայծառությունը՝ Աստծո գեղեցկությունը, հողը խորհրդանշում է Աստծո՝ ամեն գոյի արմատ լինելը, ջուրն ու օդը՝ որ առանց Աստծո չկան մտքի մաքրություն ու կյանք, և այլն: Եվ միայն մարդն ու հրեշտակային դասն են, որ բանականությամբ Աստծո պես են: Այս շարակարգում հարկ է գիտենալ նաև, որ արարչագործության խորհուրդը համերաշխ է փրկության խորհրդի հետ. հանդիպել Քրիստոսին՝ նույնն է՝ հանդիպել Սուրբ Երրորդությանը:

Արարչությունն ու փրկագործությունը Աստծո անսահման սիրո դրսևորումներն են: Արարչությունն ունի իր աստիճանակարգությունը՝ արարչագործություն—մարդեղություն—փրկագործություն: Ընտրյալ ժողովրդի պատմությունն իմաստավորվում է Սուրբ Հայտնությամբ՝ Աստծո ներկայությամբ: Ըստ այսմ՝ արարչության հիմնական գաղափարը վստահությունն է տիեզերքի հանդեպ: Աստվածից զատ՝ արարչությունը պաշտամունքի համար է, որ փառավորենք Արարչին: Սա օրենք է, որը երևում է գալիս Տիրոջ օրը պահելու հրահանգի մեջ և բովանդակում մարդու և Աստծու փոխհարաբերությունը, որն առավել ամբողջական բնութագրվում է «ուխտ» բառով: Ուստի՝ արարչությունը նախապատրաստությունն է հետևող բոլոր ուխտերի: Ուրիշ խոսքով՝ արարչագործությունն Աստծո և մարդու «համբույր» (Ծննդ. Բ 7) կամ սիրո պատմությունն է, որի իմաստն ու նպատակը բյուրեղանում են Հովհաննեսի Ավետարանի Ա 1—4, 9—10, 15—17 դրվագներում՝ Բանի՝ Աստծո խոսքի մասնակցությամբ:

Հին Կտակարանում նշմարվող արարչության վարդապետությունն իր լրումին է հասնում Նոր Կտակարանի մեջ՝ մոր արարչագործությամբ ու փրկությամբ: Քրիստոսով իրականանում է մի մոր արարչագործություն, որտեղ արարչագործությունն ու



փրկությունը համատեղվում են: Քրիստոս՝ իբրև համարարիչ և ժառանգորդ՝ բովանդակ իշխանությամբ երկնքում ու երկրի վրա, Ս. Հոգու միությամբ հաղորդակցության մեջ է մտնում մարդկության հետ՝ մոր արարածներ դարձնելու համար՝ արժանի մոր երկնքին ու մոր երկրին:

— **Արարչագործության պսակը կամ գլուխգործոցը մարդն է՝ Աստծո եզակի պատկերը տիեզերքում: Աստված սրբազնագործությունը պսակեց մարդու արարմամբ և տվեց նրան իր գործի շարունակության պատիվը: Բայց գիտության ծառի պտղի ճաշակմամբ մարդն անհնազանդություն դրսևորեց Արարչի հանդեպ և զրկվեց դախտային կյանքից: Անմահության գաղտնիքն ինչն է Աստված թաքցրեց մարդուց: Անմահությունն անկատար մարդու համար անհասանելի պիտի մնա մինչև կատարելությանը հասնելը:**

— Աստվածաշնչի առաջին իսկ տողերից պարզ է դառնում, որ մարդու արարումը միանգամայն որոշակի նպատակ ունի: Հավիտենական և ամենազոր Աստված կամեցավ ստեղծել աշխարհը և իր հայտնությունը շնորհիվ մարդուն՝ համաժամանակ և՛ հոգևոր, և՛ մարմնավոր էակին, որը գտնվում է իր խնամատարության ներքո և ստեղծվել է իշխելու համար: Արարչագործության շարակարգում այնքան կարևոր ու նշանակալի է մարդու դերակատարությունը, որ անգամ հրեշտակները պարտականություն ունեն սպասավորելու նրան: Հետևաբար՝ մարդ արարածի կոչումն իր արժանիքը գիտակցաբար պահպանելն է և հոգևոր զարգացմամբ Աստծո հետ գործակցելը: Արարչագործության վերջում Աստված, իբրև «սքանչելիքների բարձրակետ» ու «արարչական կամքի միջնորդ», մարդուն ստեղծեց իր պատկերով, որ վերջինս ձգտի անել այն, ինչ Արարիչը որոշել է:

Ձեր հարցին ամբողջական պատասխանելու համար հարկ է նաև անդրադառնալ քրիստոնեական մարդաբանությանը: Մարդաբանությունն արարչագործության գլխավոր թեման է, որովհետև մարդն արարչության կենտրոնն է: Որպես աստվածային ստեղծագործության զազաթմակետ և նպատակ՝ մարդն իր բարիքին հասնում է միայն Աստծո հետ միասնության մեջ: Ըստ Ս. Գրիգոր Նյուսեանի՝ մարդը «միկրոաշխարհ» է, սակայն ոչ այն պատճառով, որ շրջապատող աշխարհն անցողիկ է, ինչպես համարում էին հին փիլիսոփաները, այլ թանի որ «տարբերվում է տիեզերքից և նմանվում Արարչի անսահման կատարելությանը», ուր արժանապատվությունը, անհատականությունն ու ինքնավարությունն անհրաժեշտ ու անբաժան տարրեր են: Քրիստոնեական մարդաբանության կենտրոնական թեման մարդու՝ Աստծո պատկերով և նմանությամբ ստեղծված լինելու իրողությունն է:

Մարդաբանությունն այն տեսությունն է, որը դավանում է մարդուն՝ որպես տիեզերքի առանցքի, և մարդկության բարօրությունն ու բարեկեցությունը դիտում է որպես վերջնական պատակ: Քրիստոնեական մարդաբանության առանցքը, ինչպես նշեցի, մարդու՝ Աստծո պատկերով և նմանությամբ արարված լինելու իրողությունն է: Առավել տարածված տեսակե-

տի համաձայն՝ Աստծո պատկերը մարդկային հոգին է՝ իր ամենաբարձր դրսևորմամբ՝ բանականությամբ: Քրիստոնեական մարդաբանության ճիշտ ընկալման համար ուշագրավ է Ս. Բարսեղ Կեսարացու այն տարածում միտքը, համաձայն որի՝ Աստված մարդուն ստեղծեց որպես կենդանի էակի, որը կոչված էր «աստված լինելու»: Աստծու և մարդու կամքի մեկտեղումը, որով մարդը հարատևում էր դախտում, ընդհատվեց զայթակողության հետևանքով գլուխ բարձրացրած հավակնոտ անհնազանդությամբ ու հպարտությամբ: Աստված, շնորհիվ մարդուն իր պատկերը, «բարեհալում» ձիրք էր պարզել, որ երկրին տիրի ու մշակի: «Տարօրինակն այն է», որ Աստծո կողմից մարդուն տրված ազատ կամքի արդարացի գործադրումով այդ «կոչումը» նվաճելու համար հարկ էր հրաժարվել դրամից: Վերոհիշյալ տեղի չունեցավ և խաթարվեց մեղքի հետևանքով: Մեղքից ձերբազատվելու և աստվածանալու համար անհրաժեշտ է Աստծու կամքի և մարդու կամքի լիակատար մեկտեղում: «Արարեմք մարդուն Մեր պատկերով (հմմտ. Կորնթ. ԺԵ 44) ու նմանությամբ» (հմմտ. Կողոս. Ա 15) սուրբգրային տեղին (Ծննդ. Ա 26) ցույց է տալիս, որ մարդը մեծարվում է գերագույն փառքով՝ որպես արարչության պսակ: Իր ստեղծումով մարդը դրվում է նախախնամական և շնորհակամ միության մեջ իր Ավգենապատճառի հետ: Հետևաբար՝ «մարդն Աստծո պատկերն է» ձևակերպումը հիմնական մարդաբանական ճշմարտությունն է, որով բնորոշվում են թե՛ մարդու «աստվածացումը», թե՛ կատարելության ձգտումը (հմմտ. Մատթ. Ե 48) և թե՛ քրիստոնեական ամբողջ բարոյական ուսմունքը:

Ծննդոց գրքի շարունակությամբ մեջ հանդիպող միտքը՝ «Տե՛ր Աստված ասաց. Ահա Ադամը դարձավ մեզ նման մեկը, նա գիտի բարին եւ չարը: Արդ, զուցե նա ձեռքը մեկնի, քաղի կենաց ծառից, ուտի եւ անմահ դառնա» (հմմտ. Սաղմ. Բ 4, ԼՁ 14, ԾԸ 9), ըստ ոմանց, բացառապես հեզմական բնույթ ունի, ըստ ոմանց՝ այլաբանություն—շրջասացություն է: Սակայն, ինչպես դիպուկ նկատել է Բյուզանդ. եղիայանը, խոսքն այն մասին է, որ «ամենագիտությունն ու անմահությունը վերապահված են միայն Աստծուն»: Ուրիշ խոսքով՝ կյանքի և անմահության ծառի այլաբանությունն այն է, որ կա սահմանափակ, որից այն կողմ մարդու կարողությունը սահմանափակ է:

Այսօրինակ մի պատվիրանադրության էլ հանդիպում ենք Մատթ. ԻԴ 36-ում. «Բայց այդ օրվա եւ ժամվա մասին ոչ ոք չգիտե. ո՛չ երկնքի հրեշտակները եւ ո՛չ էլ Որդին, այլ՝ միայն Հայրը»: Այդուհանդերձ, պետք է ասել, որ Աստծո և մարդու միջև իրապես գոյություն ունի հավասարության մի եզր. մարդը բաժնեկից է Աստծո տերությանն ու օժտված է ազատ կամքով, դրա համար էլ նա «դուրս է գալիս կախյալ վիճակից, մերժում է հնազանդվել Աստծուն և իր կամքի շնորհիվ իրեն անկախ է հռչակում»: Հետադարձ ուր կյանքի սկզբունքը ոչ թե հնազանդություն է, այլ իր ազատ գիտակցությունն ու ցանկությունը, և վերջինս գործնականում դադարում է իրեն իբրև արարած նկատելուց, դիպուկ խոսքով՝ ապստամբում է: Մար-

դու հանդուգն մրցակցությունը սանձահարելու համար Աստված արգելում է նրան ձեռք մեկնել կենաց ծառին և այդպիսով անմահության հասնել, որովհետև այսկերպ մարդը կարող էր կրկին արդարացնել իրեն, ինչպես նաև անարգել Աստծո սահմանած օրենքը: Այս մասին անդրադարձ ունի նաև 5-րդ դարի եղիշե վարդապետը. «Ադամը կասկածելով՝ փորձելով է, որ ճանաչում է չարն ու բարին, ոչ թե զորությամբ՝ վաստակով, և չի բացառվում, որ նույն կերպ էլ ուզեմա անմահություն ձեռք բերել»:

— **Աստված մարդուն ընտրեց իր արարչագործությունը շարունակելու և պահպանելու ժառանգորդ՝ նրան կտակելով տիեզերքի աստվածահաճո տիրակալությունը և մարդկային կյանքի շարունակականությունը: Որքանով է այսօր մարդն իրագործում իր աստվածատուր առաքելությունը:**

— Ծննդոց Ա գլխի հիմնամասպատակը մարդկության առաջացման պատմության նկարագրումն է, 6-րդ օրվա խորհուրդը ներկայացնելը: Մարդն իր նմանի մեջ ու միջոցով տեսնում և նմանվում է Աստծուն: Մարդը միակ արարածն է, որի հետ Աստված երկխոսություն ունի: Մարդն ստեղծվում է արարչության վերջում: Սա մի կողմից ցուցանում է մարդու առավելությունները, իսկ մյուս կողմից՝ որ մարդը մասնակցություն չունի արարչությանը:

Աստվածաբան Եզնիկ Կողբացին իր աշխատասիրություններում առաջադրել-հանդիպողն է մարդու ազատ կամքի գաղափարը և գիտակցված չարիքի խնդիրը: Աստծո արարածների շարքում որևէ չար բան չկա, բայց մարդն իր մտքով ունակ է չարիք հաղորդելու երևույթին: Ըստ հեղինակի՝ բոլոր չարիքների պատճառը բարոյական սկզբունքի խախտում-խաթարումն է: Այլ խոսքով՝ շնորհիվ իր բազմախորհուրդ սիրո և անսպառնալիքության՝ Աստված կամեցավ հաստատել սիրո արքայություն և իր հայտնությունը պարզելու հրապարակում ու նմանությունը կրող արարածին: Ծնորհիվ կամքի ազատության՝ «բարոյական ինքնավարության» մարդը մշտապես ընտրության առաջ է՝ կամ ընտրելու բարին, կամ կորցնելու իր «արժանապատվությունը», ինչպես ներկայացնում է երանելի Պողոս առաքյալը (հմմտ. Գաղ. 5 13):

Աստվածաշնչում նկարագրված մի շարք դրվագներ գալիս են հաստատելու, որ թե՛ Աստծո անձեքը և թե՛ օրհնությունը տարածվում են համայնի վրա անփոփոխ սկզբունքով: Թվում է՝ աստվածային այս անվրեպ հետևողականության առկայությունը վաղուց պետք է նշած լինե՛ր մարդկությանը՝ զոհն առավել գիտակից հատվածին՝ ավելի նախանձախնդրորեն ընդդիմանալու աշխարհում տեղի ունեցող աստվածամերժ ու մարդատյաց գործընթացներին (սողոմականության խրախուսումը, միասեռ ամուսնությունների օրինականացման փորձերը, արհեստածին սեռերի առաջբերումը, քրիստոնյաներին բռնության ենթարկումն ու բնաջնջումը, մարդկանց ու հատկապես երեխաների և նրանց ներքին օրգանների թրաֆիքինգը, վանդալիզմը, թմրադեղերի, զենքի և այլն-ի առևտուրը, նաև հասարակությունների մեջ առկա բազմաճյուղ շերտավորումներն ու բևեռացումները, տղա-մարդու բազմակնություն իրավունքի և կնոջ մեծամասնության պարտականության հանդիպողությունը, բազմակի ամուսնություններն ու բաժանումները), ինչպես նաև առավել նպատակային ու հանձնառու ընդհաղորդվելու աստվածահաճո ձեռնարկներին: Սակայն, դժբախտաբար, «մարդիկ յուրյանց ինքնակամությամբ բոլորովին այլ ճանապարհներ են բռնում՝ թե՛ յուրյանց խորհուրդներով, թե՛ գործերով ու թե՛ լոկ աշխարհային ոգով» (հմմտ. Ես. ԾԵ 8, Սաղմ. Բ 1—3, Հռոմ. Ա 18, Եփես. Զ 16): Սակայն, անկախ մարդկության բռնած ընթացքից, միևնույն է, աստվածային անշեղ օրենքով աշխարհն ընթանալու է դեպի իր նպատակը, ինչպես որ ընթերցում ենք Ս. Մատթեոսի Ավետարանում. «Եվ արդ, ձեզմից ո՛վ կարող է հոգս անելով՝ իր հասակի վրա մեկ կանգնում ավելացնել» (Մատթ. Ե 27): ➡ էջ 8

Ատրպատականի թեմական առաջնորդ Ներսես Մելիք-Թանգյանի ազգանվեր գործունեությունը 1914—1921 թթ.

← էջ 5

Թավրիզ են տեղափոխվում Խոյի կոտորածից ազատված հայերը:

Բնութագրելով Ներսես արք. Մելիք-Թանգյանի գործունեությունը՝ Թեհրանում հրատարակվող «Րաֆֆի» տարեգիրքը նշում է. «...Բաւական է յիշատակել 1915—1916-ին Արևմտեան Հայաստանից Ատրպատական ապաստանած բազմահազար գաղթականների, 1918-ին տաճիկ բանակների ներխուժման հետևանքով Ատրպատականի հայաշատ զաւառներից գաղթած գիւղացիների եւ 1921-ին Հայաստանից Թավրիզ անցած աւելի քան տասն հազար տարագիրների պաշտպանութեան ու խնամատարութեան գործին բերած նրա հայրական գործակալութեան հոգատարութիւնը, Երկրորդ աշխարհամարտի ընթացքին Ատրպատականի հայ համայնքին սպառնացող վտանգալից փորձութիւններին դիմագրաւելու իր ճիգերն ու զոհողութիւնները, պատկերացնելու համար այն փոթորկալի կեանքը, որ ունեցաւ Մելիք-Թանգյան սրբազանը, առընթեր իր թեմի ազգային-եկեղեցական ու կրթական մարզերին վերաբերող ընթացիկ աշխատանքներին»:

Ներսես Մելիք-Թանգյանի ազգային-քաղաքական գործունեության կարևոր դրվագ է նաև Չանգեզուրի ինքնապաշտպանությունը: Դեռևս 1905 թվականին՝ հայ-թաթարական ընդհարումների ժամանակ, ինչպես վկայում են ժամանակակիցները, նա դարձել էր Չանգեզուրի հայության պայքարի ոգին և հոգևոր առաջնորդը: Այդ շրջանում նա Երևանի թեմի Տաթևի փոխանորդության առաջնորդն ու վանահայրն էր և իր անվեհեր վարքով ոգևորելով տեղի հայությանը՝ միաժամանակ ինք-



Ներսես Մելիք-Թանգյան

նապաշտպանությունը կազմակերպելու նպատակով համագործակցում էր Հայ հեղափոխական դաշնակցության որոշմամբ Սեբաստացի Սուրադի գլխավորությամբ Չանգեզուր եկած ֆիդայիներ Կայծակ Առաքելի, Կորյունի և մյուսների հետ՝ կազմավորելով կամավորական ջոկատներ: Նա անդադար շրջում էր հայկական գյուղերում, քաջալերում ժողովրդին, ինքնապաշտպանություն քարոզում, միաժամանակ կողմ դիմումներ ուղղում փոխարքային ու

իշխանություններին՝ նրանց հասցնելով հայության ողբերգական վիճակն ու բողոքը: Այդ օրերից սկսած՝ ժողովուրդը նրան անվանեց «Չանգեզուրի Ղևոնդ Երեց»:

Ներսես Մելիք-Թանգյանի ավանդը մեծ է նաև իայ գաղթականության՝ Ատրպատական վերադարձը կազմակերպելու գործում: Ատրպատականում հայության վերաբնակեցումը հետագայում ռազմաքաղաքական առումով նպաստեց Հայաստանի առաջին հանրապետության անվտանգության ապահովմանը: Ատրպատականի հայոց թեմական առաջնորդը գործեց նաև հայոց նորանկախ հանրապետության և Իրանի իշխանության միջև կապերի սերտացման ուղղությամբ: Իսկ երբ Հայաստանի խորհրդայնացումից հետո մահվան դատալճոխ առաջ էին առաջին հանրապետության ղեկավարությունը և դաշնակցականները, նա թավրիզում իր հոգածության տակ առավ բոլորին:

Ներսես Մելիք-Թանգյանն ամեն հնարավոր աջակցություն ցույց տվեց նաև Գարեգին Նժդեհին Չանգեզուրի ինքնապաշտպանության ժամանակ՝ ուղարկելով զենք, պարենամթերք, դրամ: Ծանոթ լինելով Նժդեհի ռազմավարական տաղանդին և մտքին՝ նա հույս էր փայփայում գորավարի առաջնորդությամբ թուրք-բոլշևիկյան հարձակումները կասեցնելու և Հայաստանն ազատելու: Եվ Նժդեհի առաջնորդած պայքարի շնորհիվ է, որ այսօր Չանգեզուրը Հայաստանի կազմում է, իսկ առանց Չանգեզուրի՝ դրվելու էր Հայաստանի՝ որպես հանրապետության լինելության հարցը: Ըստ պատմական որոշակի տեղեկությունների՝ Չանգեզուրի՝

Աղբեջանին բռնակցելու պարագայում Հայաստանը վերածվելու էր մարզի և միացվելու Վրաստանին:

Ներսես Մելիք-Թանգյանի հայրենամուտ գործունեությունն առիթ դարձավ խորհրդային տարիներին նրա հանդեպ հետապնդումներ սկսելու: Խորհրդային իշխանություններն ամեն քայլի դիմեցին, Ամենայն Հայոց Կաթողիկոսի հանդեպ ճնշումներ գործադրեցին, չեղիստներ ուղարկեցին Իրան՝ նրան էջմիածին վերադարձնելու, ձերբակալելու և դատելու համար, մինչև իսկ մահափորձ կազմակերպեցին նրա դեմ: Բայց թիկունքում ունենալով նաև իրանահայության մեծ սերն ու պաշտպանությունը՝ քաջ հոգևորականը չենթարկվեց ոչ մի հրահանգի՝ համապատասխան բացատրագրեր ուղարկելով Ամենայն Հայոց Կաթողիկոսին: Ավելին. Հայ Առաքելական Եկեղեցու դեմ խորհրդային ժամանակներում սանձազերծված բռնաճնշումների ժամանակ Իրանից թեմական առաջնորդը գորակցություն էր հայտնում Մայր Աթոռին՝ դիմում-բողոքներ հղելով այդ առիթով:

Մեծ հոգևորականի անձնվեր գործունեությունը գնահատանքի արժանացավ ոչ միայն իր հարազատ ժողովրդի և Մայր Աթոռի կողմից. անձնվեր ծառայության համար Մայր Աթոռը Ներսես Մելիք-Թանգյանին արժանացրեց արքուքյան պատվի՝ շնորհելով նրան արքեպիսկոպոսի աստիճան: 1919 թ. Իրանի կառավարությունը հայոց թեմական առաջնորդին շնորհեց պետական պարգև՝ պարգևատրելով նրան «Առյուծ-արև» շքանշանով:

Արփինե ԻՇԽԱՆՅԱՆ

Արարչագործությունը և մարդը

← էջ 7

— Ընդունված է «արարչագործություն» հասկացությունը կիրառել միայն Աստծո պարագայում՝ որպես Նրա հատկորոշիչ: Մարդը ևս աստվածապարզ և հատկությամբ ստեղծագործում է: Մարդու դեպքում չէ՞ք կարող կիրառել «արարչագործություն» եզրույթը: Օրինակ՝ մանկան ծնունդը կամ արվեստի մեծագույն ստեղծագործությունը, որոնք երկուսն էլ են լինում, նույնպես արարչագործություն չեն: Մարդկային գիտակցությունն առհասարակ չի կարող հասնել արարչագործության:

— Հարկ է գիտենալ, որ արդի ազատականացումը հանգեցնում է նկատելի փոփոխությունների ամենատարբեր ասպարեզներում, այդ թվում՝ տղամարդկանց՝ կին հարաբերություններում, նրանց առաքելության ու գործառնությունների մեջ: Նախ պետք է պահպանել ինչպես տղամարդկանց, այնպես և կանանց ազատությունը, ինչը ենթադրում, նաև պահանջում է քրիստոնեության մեջ վաղուց գոյություն ունեցող հայեցակետերի ուսումնասիրում, լրացուցիչ վերլուծում և մեկնաբանում: Նոր Կտակարանն ընդգծում է ընտանեկան կյանքի հոգևոր կողմը (հմտ. Ա Տիմ. Ե 8), ըստ որի՝ ընտանիքը միայն իր գոյությամբ չէ, որ ծառայում է սիրո նպատակին, այլ նաև գործունեությամբ: Քրիստոնյա ընտանիքը տղամարդու և կնոջ միությունն է, որը իմնված է ոչ թե պարզ փոխօգնության, ցանկությունների կամ ընդհանուր շահերի վրա, այլ աստվածադիր օրհնության, որտեղ Աստծո պատվիրանները փոխանցվում են սերնդեսերունդ, և ընտանիքը «հավակնում է» դառնալու «տնային» կամ «առտնին եկեղեցի» (հմտ. Կող. Դ 15): Արարչագործության պատմությունը ցույց է տալիս, որ Աստված աշխարհն ստեղծել է իբրև մեկ միասնական ընտանիք, որի կենտրոնը մարդն է: Մարդու արարումով է, որ շունչ է ստանում ողջ կենդանությունը. «...Եվ մարդ չկար, որ մշակեր հողը...» (Ծննդ. Բ 6), և մախախմամբ մարդուն է վերապահված միասնական ընտանիքի երաշխավորությունը. «Ահա ձեզ տվեցի...» (Ծննդ. Ա 29):

Աշխարհի՝ որպես մեկ միասնական ըն-

տանիքի մասին է վկայում և այն փաստը, որ մարդու պատվիրանագնացության հետևանքը տարածվում է ողջ կենդանական աշխարհի վրա: Սկզբունքի գործարարման ակնհայտն էնք նաև առաջին եղբայրասպանության պարագայում, պատվիրանագնացությունից առաջ և հետո կատարված դեպքերի շրջագծում: Քրիստոնյայի համար թե՛ Հին Կտակարանի փորձառությունը և թե՛ Նոր Կտակարանի հորդորները ոչ թե ինքնամայատակ իրամաններ են, այլ վերահաս փորձանքներից ու դժվարություններից հետո պահելու և գործնականում քրիստոնեական բարոյական արժեհամակարգին առնչակցելու հնարավորություն:

Մարդու մեջ Աստծո պատկերն ամենացայտուն կերպով արտահայտվում է նրա ստեղծագործելու ունակությամբ միջոցով: Ստեղծելը կամ ոչնչից արարչագործելը միայն Աստծուն է բնորոշ և Նրա հատկությունն է: Մարդը բնականորեն, հոգով ու մարմնով իր մախորդների ժառանգն է, իսկ էապես՝ Աստծո արարչական գործունեության հետևանքը: Ուստի, Սուրբ Գիրքը մի կողմից՝ ժառանգականությունն է շեշտում, մյուս կողմից՝ Աստծո արարչական կամքի նշանակությունը: Դառնալով ընտանիքի՝ հարկ է նշել, որ այն սկզբնավորվում է Աստծո օրհնությամբ, հետևապես՝ Աստծո համար է և առաքելություն ունի ապահովելու ինչպես հոգևոր-բարոյական կրթություն (հար և նմա հանրային կյանքում եկեղեցու ունեցած գործառնություն), այնպես էլ սիրով, միության ու հոգատարությամբ պայմանավորված դաստիարակություն, ինչը կրկին ստեղծագործական ընթացք է ենթադրում: Երկու տարբեր սեռերի փոխադարձ ձգտումը Արարչի կողմից աշխարհ ներմուծված ձգողականության տիեզերական օրենքի մի մասնավոր արտահայտություն է, որն արարչության շաղախն է:

Այսպիսով՝ ամենաբարի Աստված, չունենալով որևէ պակասություն, չկանցավ միանձնյա վայելել «յիւրական ճոխութիւնը», այլ «արար գմարդն ի պատկեր իւրոյ» (հմտ. Ծննդ. Բ 7), ինչը նշանակում է կյանքը պատկանում է Աստծուն և տրվում է մար-

դուն իբրև պարզ, թեպետև Աստված իշխանություն ունի նաև մահվան վրա:

Դժբախտաբար, մարդը «չկամեցավ» գիտակցել իր ազատ կամքի ու կոչման (հմտ. Ա. Կորնթ. ԺԵ 45—47) առավելությունը և զրկվելով Աստծո հետ հաղորդակցությունից՝ ընկավ կատարյալ աշխարհասիրության մեջ: Մարդն իր անհավատությամբ ու անհավատարմությամբ սկսեց ձգտել ոչ թե առ Աստված, այլ դեպի աշխարհ, ուստի՝ ոչ թե բարձրացավ, այլ ընկավ: Այսպես, մարդը մարմնապես ևս զրկվեց աստվածային հավերժական փառքի վայելքից և ապակնացու կյանքի «կերակուր» դարձավ՝ ժառանգելով մահը: Ուշագրավ է, որ նույնիսկ անհնազանդությունից և պատվիրանագնացությունից հետո Աստված չի լքում Իր ստեղծած մարդուն, այլ շարունակ պահում է Իր հոգածության ներքո: Ս. Գրիգոր Նազիանզացին ասում է. «Նա, որ սկզբում մարդուն ստեղծեց՝ ազատ ու ինքնիշխան անելով, միայն պատվիրանի օրենքին ենթարկեց նրան և դախտային բերկրության առատությամբ օծում: Առաջին մարդուն հատկացնելով և ցվիրելով... շնորհները... Գվիրած եղավ նաև հաջորդող բոլոր սերունդներին»: Եվ ուրեմն՝ նա, ով պահում է պատվիրանը, անձնավորվում է իր ներաշխարհով, գոյավորվում է որպես Աստծո պատկեր, իսկ ստեղծագործելու ձիրքով միանում, համացել է դառնում Տիրոջ:

— Դարույր Սևակը բանաստեղծին կոչում էր «Աստծո քարտուղար»: Բանաստեղծներին էլ ներհատուկ են մարգարեանալու և արարելու շնորհը, կյանքը մաքրագործելու, արդարությունը, ճշմարտությունը, բարին և լույսը տարածելու առաքելությունը: Դուք նույնպես ստեղծագործում եք. բանաստեղծությունների, պատմվածքների, վեպերի ու վիպակների հեղինակ եք: Ինչ է ստեղծագործական գործընթացը Ձեզ համար: Կրթագործը ներշնչանքի պահի հայտնությունը Ձեր ստեղծագործական ճանապարհին:

— Դարույր Սևակը 20-րդ դարի ամենաինքնատիպ մտածողներից է, հոգևոր հսկա՝ մնայուն ժառանգությամբ: Այո, արարչագոր-

ծություն է նաև ստեղծագործական ընթացքը, քանի որ բուն արարչագործությունը մի կողմից վկայում է Արարչի բացարձակ ու անպարագրելի հատկանիշների և մասնավորապես՝ սիրո մասին, իսկ մյուս կողմից՝ ճանաչեցնելով այդ սերը՝ մեզ ներշնչում ու մղում է երախտագետ լինելու և գիտակցական հավատքով ըմբռնելու մեր կոչումը և բաժնեկից դառնալու Տիրոջ փառքին:

Ընդամեն արձանագրելի է, որ ստեղծաբանական տիրույթն օժտված է վերժամականային դերակատարությամբ, որ մտա-հայությունը յուրաքանչյուր իմացական ներապրումն է, իսկ արդեն արարչագործելը՝ մարդու և ժամանակի ներդաշնակ ընդելուզման հատկականությունը: Այս ճանապարհին ներշնչանքի աղբյուր կարող է լինել ամեն մի հույզ, անսահման արարչագործության յուրաքանչյուր մանրափոշի:

— Շնորհակալություն հարցազրույցի համար, Հայր Սուրբ:

Հարցազրույցը՝ Մեղրի ՂՈՒԿԱՍՅԱՆԻ

ՔՐԻՍՏՈՆՅԱՆ ՀԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝ Մայր Աթոռ Սուրբ Էջմիածին Հրատարակիչ՝ «Քրիստոնյա Հայաստան» թերթի խմբագրություն

Գլխավոր խմբագիր՝ Նարինե Հովհաննիսյան

Գրանցման վկայական՝ 624
Խմբագրության հասցեն՝

Մայր Աթոռ Սուրբ Էջմիածին
Հեռախոս՝ (010) 517 280

Էլ. փոստ՝ qristonyahayastan1@gmail.com
qristhay@etchmiadzin.am
web կայք՝

krishayas.wordpress.com
etchmiadzinlibrary.am/en/kristonya-hayastan

Ստոր. տպագր. 2.06.2025 թ.
Տպաքանակը՝ 1265